


天津縣新志卷二十三之一

藝文一



自班書志藝文其體遂爲史家通例逮宋有崇文總目而讀書志書錄解題諸作繼之至於提要斯事美備古今言目錄者莫能外焉方志之有藝文其書多鄉里流傳非若珍儲於中祕而茲編之輯顧敢比七略之校效四庫之藏乎第以操觚之士埋首窮年箸爲文章大率自抒胸臆而一世功勤所積藉此芟芟者以傳使書存而不揭其旨無以明作者之志也書亡而不標其目無以表作者之名也故徧訪簡編各識厓略凡其所斟錄

天津縣新志

卷二十三之一

一

出諸序跋者十之七得諸見聞者十之三其語必信而有徵其事則述而不作也憶自庚子之亂鄉人遺箸半就散亡泊乎西學東漸耳目乖異陳編所在有棄若土苴者人謂文字沈霾其禍甚於兵燹非過論也不於此網羅而彙錄之設文運有再昌之會人心有復舊之時後學溯師友淵源子孫求先人著作恐欲致一殘編蠹簡以稍窺大凡焉而亦渺不可得豈非今日執筆者之咎哉此所以不嫌僭越而必欲求詳求備之微悒耳

易翼述信十二卷

刻本

王又樸撰

存

又樸字從先有傳是書采入四庫其提要略云是

編經傳次序悉依王弼舊本而冠以讀易之法終以所集諸儒雜論大旨專以象象文言諸傳解釋經義自謂篤信十翼述之爲書故名易翼述信而以朱子所云不可便以孔子之說爲文王之說者爲非其徵引諸家獨李光地之言爲最夥而於本義亦時有異同至其注釋各卦每爻必取變氣蓋卽之卦之遺法其於河圖洛書及先天後天皆不列圖而敘其說於雜論之末特爲有識其後唐鑑纂國朝學案小識以又樸列入編內所敘學派殆卽本此

天津縣新志

卷二十三之一

二

周易經史彙參四卷周易集說一卷

刻本

查彬撰

存

彬字憩亭埭查爲義傳是書總名湘薌漫錄牛鏗序云先生曩有采芳隨筆詞采雅贍顧不足爲先生重惟是書以人事言天道其裨於世教匪淺費庚吉序謂是書以經爲經以史爲緯其義正其學博其詞典而賅其旨微而顯

周易函書補義八卷

刻本

李源撰

存

源字春潭有傳源喜治易尤心契胡煦周易函書案周易函書正集久佚其刊行者曰約存曰約注曰別集今源書不錄原文直伸己說則是所補之

義卽在所述之中順德羅惇衍序謂是書以象數
闡河洛之精其解釋圖書數理雖依邵子加一倍
法而實仍馬鄭荀虞之舊說則源之此著殆能兼
漢宋之長者矣

易義輯聞二卷

刻本

沈兆澐撰

存

兆澐字雲巢有傳是書爲其晚年所訂其凡例云
仿逸中立周易劄記陳祖念易用例不載經文又
云就程傳朱本義觸類引伸又云引史證經切於
修齊治平之道以此觀之蓋易學家義理之書與
查彬之周易經史彙參同旨其體例雖近於衍義
而引史證易宋人讀易詳說實開其先然則理驗
天人意存勸戒固是義經本旨也

易學派源二十四卷

槧本

吳士俊撰

存

士俊字傅巖有傳是書前列易說彙解未有讀易
雜錄各二卷餘俱正經也大旨蓋以河圖洛書聖
人則之作易者從象數出注易自當從象數入自
晉王氏易行而馬鄭荀陸諸家俱廢漢學失傳者
千餘年所幸唐李鼎祚網羅漢儒易說三十餘家
近世毛奇齡惠棟張惠言亦各有祖述微言大義
猶有存者士俊薈萃納甲納音爻辰卦氣以及焦

天津縣新志

卷二十三之一

三

氏世應虞氏消息諸說從象數推勘理氣引彼證此以經注經俾人知治易當於理氣象數參互闡發六通四辟斯爲正宗也

古本周易集注十二卷

華長卿撰

長卿字枚宗有傳

尙書簡明錄

周人麒撰

人麒字次游有傳

尙書補闕一卷

刻本

華長卿撰

存

自序略謂尙書自東晉之古文出而西漢之古文亡後學奉蔡沈集傳爲圭臬真偽雜錯獨惜泰誓

天津縣新志

卷二十三之一

四

一篇出於漢代立在學官反爲僞泰誓所斂乃就尙書大傳史記左傳論語孟子所引泰誓之文哀輯一冊並集馬鄭諸家之注以詰其義又謂泰誓今文一篇古文分爲三今仍爲一長卿尊經重漢黜梅賾僞古文而不信輯爲此篇以還真泰誓之舊故曰補闕

毛詩簡明錄

周人麒撰

說詩求似一卷

鈔本

楊一崑撰

存

一崑字二愚有傳是書因朱子說詩不遵小序所爲辨說詆國風尤力其實春秋時季札觀樂邶鄘

衛俱入歌章燕饗賦詩不廢蔓草褰裳諸什可見
鄭衛不皆里巷狹邪之作而集傳廢序其失未可
袒也乃取詩序與詩傳詩說參互考證不盡駁朱
亦不盡依古訓各擷所長自序謂不必其是惟求
其似耳至詩傳詩說俱出偽託而一崑此著意在
集眾說以證經但論義之純駁不問書之真贋與
墨守一家者固異也

毛詩識小錄四卷

華長卿撰

儀禮圖說二卷

華長卿撰

禮記纂言

周人麒撰

天津縣新志

卷二十三之一

五

家禮通宜

于升撰

升字敬符埒于京傳

古禮釋一卷

鈔本

張大仕撰

存

大仕字煦林埒周光裕傳是書無序跋蓋其子壽
哀集遺箸就其所作經解擇有關古廟制宗姓及
昏喪祭饗之屬得文二十八首別爲一編曰古禮
釋其爲題殆皆向來禮家聚訟糾紛莫衷一是者
大仕涉獵羣書博引而慎取凡所斷制皆謹守師
法以經詁經不涉臆造也

左傳臆說四卷

刻本

查日乾撰

日乾字天行有傳是書蓋其讀左時意有所得隨筆錄存其體類於劄記長沙陳鵬年嘗爲之序其子禮復加校錄刻之於廣西卷末跋識謂日乾少失學年二十餘始讀書俱能成誦生平最嗜左氏傳此書論斷多古人所未發覽者當自得之

左傳類編十卷 鈔本 楊一崑編 存

是書以春秋各國爲篇而析左傳之文分隸之凡爲國十有一周魯鄭宋衛齊楚外晉與秦吳與越皆同爲一篇每篇隸事先後仍以魯十二公紀年爲序俾學者讀一國之傳卽可以知一國興亡之

天津縣新志

卷二十三之一

六

故公穀國語可資補綴或有所考證者亦采及之

春秋三傳經文考異一卷 藁本 華長卿撰 存

是書取三傳所錄經文而互校之摘其人名地名之不同及文有增益者依十二公年序分列於下對舉原文而亦間有所正蓋以三傳異文迭出有此可資考辨亦治經者之助也

大學原本說略一卷 讀法一卷 刻本 王又樸撰 存

自大學從禮記析出單行宋儒意爲竄易遂多改本世所通行者出自朱子者也又樸幼讀朱子之書又見陽明有古本之刻心有所疑輒爲論箸然

猶未遽擯紫陽迨後得西河集讀其大學證文乃信已見之未謬而亦不盡以毛說爲然自是反復研求無地無時不取所謂家國天下身心意知一體察而稱量之自髫年以至於老覺此書原本本自完密一貫而所爲說略乃敢確然自信於所著書中可與易翼同爲愜意之作其不曰古本而曰原本者蓋對改本而言並無所謂今本爲之配偶也

中庸總說一卷讀法一卷

刻本

王又樸撰 存

中庸爲孔子言性與天道之書世苦難讀自朱子

天津縣新志

卷二十三之一

七

釐爲三十章已失首尾一貫之舊宋明理學家解釋意義又驚爲幽渺之論末流所極遂至儒釋莫分又樸所爲總說融會貫通悉由涵泳白文而來自謂一篇直如一句其不爲章節所拘可知又謂讀書在身心上倫理上領會自覺近裏切實其不爲虛無之說又可知總說屬稟於通籍以前迨再仕關中猶時有商榷蓋已竭半生之力矣讀法則於朱子所著九條外復廣以已見亦閒引他家以證之

論語廣義

王又樸撰

論語集解二卷

郭錫撰

錫字筠坡舉人

論語類編二卷

稟本 華長卿編 存

是書析論語各章使以類相從或以聖言為類或以引經為類或以門弟子問答各就一人為類又有以論語譜名篇者以聖言分隸年譜之內略如朱子論語序說所注孔子世家但各類先後無序蓋稟具未及編次之書也

四書引經義釋一卷

鈔本 張鳴陽撰 存

鳴陽字雝鳴選拔貢生官知縣是書先列四書所

天津縣新志

卷二十三之一

八

引經文於前再列全經文於後各以己意疏解之前釋引經之義後釋本經之義使學者互證而得其旨脫稟於順治戊子卷首自署芹鄩散士蓋猶在貢選以前雖為授徒治舉業而作要不失為義理之學也

四書大全拾遺

周人麒撰

四書教子尊經求通錄四卷

刻本 楊一崑撰 存

是書與其所著說詩求似體例相類蓋以孔孟之言悉本情理諸家解釋漢儒或失之鑿宋儒或失之晦乃取注疏與集注對勘而評斷其是非其諸

家義俱未安者則參以己意全書多引毛奇齡四書改錯之言爲證然毛說未合者亦駁之詆朱過甚者力辨之其標名求通謂通達世事世情以求合聖人之旨也曰錄言非章櫛句梳第說經之筆記耳

四書注疏約參

陸樟撰

樟字香嶼有傳

四書講義二卷

梅成棟撰

成棟字樹君有傳

四書音補一卷

刻本

張大仕撰

存

天津縣新志

卷二十三之一

九

大仕以學僮入塾必先誦習四書因爲之正其音讀補朱子集注所未備但注字音不釋字義然有義隨音變者亦偶及之後增土音正誤分四聲列入取便檢閱大仕聲音訓詁之學具有根柢此乃出其緒餘與鈔錄字書者有別也

說雅六卷

華長卿撰

是書見太倉王寶仁說文形聲表序中謂長卿別將爾雅十九篇撰爲說雅專論字義與此互相發明

緘齋爾雅注三卷

鈔本

華鼎元撰

存

鼎元字文珊埏華長卿傳鼎元以爾雅爲幼學讀書津梁郭注確而失之略邵正義博而失之濫乃合兩家之言折衷之積三四年遂成此稟留爲家塾讀經之助緘齋者鼎元箸書之號也

五經解

洪天錫撰

天錫字吉人有傳

五經提綱一卷

鈔本

張廷選撰 存

廷選字治堂埏周光裕傳是書略師書序詩序遺意凡有篇名者每篇撮舉數言以明大義所在其於春秋書事則擇要分類而總記之文法一氣相

天津縣新志

卷二十三之一

十

承翦裁工整便記誦也繆共位爲之序

解經一粟集十二卷

鈔本

張大仕撰 存

是集多學海堂月課之作其子壽爲之編次以十三經先後爲序院長李慈銘謂大仕長於解經分肌擘理皆以聲音通之凡古今疑義諸儒聚訟者皆能折衷一是訓詁名通足解人頤慈銘一代經師授受之間具有家法故是作非因襲餽飭者所能也

經義擇精十四卷

鈔本

張大仕輯 存

大仕長於解經故有斯選自國朝崇尚經學乾嘉

以來稱爲極盛諸家文集書院課藝不少精粹之作是書采掇繁富依體編次凡爲解二卷釋二卷考二卷辨三卷說三卷論二卷雜箸一卷蓋詁經之文自有體製此編所以法前賢示後學也

十三經集字音義便覽十四卷 鈔本 張彭齡輯 存

彭齡字芝庭舉人候選教諭是書以坊行十三經集字有音無訓乃依其本逐字詳稽凡字有數音數義皆彙注之惟四子並錄全文旣於始見之字彙注音義其有此書已具復見彼書者仍注本音本義取便初學故特加詳焉

天津縣新志

卷二十三之一

十一

說文形聲表十四卷 鈔本 華長卿撰 存

是書將解字原本始一終亥按其偏旁別爲編纂凡从某某聲从某从某省聲之字俱改歸偏旁之下凡从某从某或从某省之字添注本字之下本字無偏旁可歸者仍載原部之後其有古文籀文重文又變體者詳加注明案長卿此箸與河間苗夔說文聲讀表同時成書皆有功許氏之學但夔書專重在聲與其所箸聲訂互爲表裏此書形聲兼貫凡諧聲字俱隸聲母之下其指事會意者則以形相從又夔書以古韵分部此則仍依本書建

首爲互異耳

說文引經考一卷

鈔本

華長卿撰 存

是書以十三經爲次錄說文所引經文於上注明所出篇名而以今文列於下對勘自知其異各錄原文不加辨證

說文韻遺一卷

鈔本

華長卿撰 存

是書以佩文韻爲準凡說文字未收入者悉依韻編列故曰韻遺其有古今字異體者雖今體已收仍以古體編入意在兩存不嫌其複故積多至四千四百五十七字

天津縣新志

卷二十三之一

十三

說文拾遺一卷

鈔本

張大仕撰 存

大仕博覽羣籍遇有引說文字而爲原書所不載及說文偏旁從某聲而某字不載於本書者俱定爲說文原有字故曰拾遺凡得字六十有一各從其部先列所據之書及其原文再卽其義雜引他書以釋之

說文一貫一卷

鈔本

張大仕撰 存

是書擇古書中之假借字或古今字爲許書所收而分隸各部者少則二字如日與粵假與格之類多則五六字如庸與盲康訟頌平與辨辯便萃莽

之類各列爲一系徵引羣言逐字詁釋以證明古實通用也

字說

殷序之撰

序之字小東坵殷維玠傳

正字原七卷

鈔本

華長卿撰

存

是書因學者於書體正俗莫能辨識乃取今體一千九百三十八字各繫以小篆以示本字之原詳注音義而以相从之字備載於下長卿熟於說文凡許書所有九千三百五十三字大徐新坵四百二字皆收入餘不濫及也仿康熙字典檢字法計

天津縣新志

卷二十三之一

三

畫得字由形悟聲一切俗體無由而誤書成其舅氏沈兆澧爲之序

字學彙攷九卷

藁本

吳士俊撰

存

是書標名匡俗者凡八卷其例以四聲隸字按佩文韻爲部每字分正俗兩體雜引諸古籍以辨之而仍以許叔重之書爲斷然時亦自據所見如以禮爲正礼爲俗謂豐爲禮之古文至說文以礼爲古禮字乃俗儒妄省增入者也曰訂譌曰析疑曰引古共爲一卷析疑引古俱僅綴一條恐非卒業之編至訂譌例與匡俗同士俊此書蓋仿顏氏千

祿字書而作第顏書重在適今故正俗之外更有通用之體此書矻俗糾誤勤於復古斯爲異耳

古人姓名通段考一卷 鈔本 張大仕撰 存

是書收集古人姓名之分見各書而彼此相歧者凡得一百三十餘人其間有由於聲同者如魏讐餘又作魏壽餘之類有由於義同者如公子喜時又作欣時之類至紀消子亦作紀消子蓋因形似疑爲傳寫之譌而概以通段名之舉最多者而言也大仕讀書隨筆記錄此外尙有未及者殆未成之書耳

天津縣新志

卷二十三之一

十四

俗音正誤一卷 鈔本 華長卿撰 存

長卿以蒙師授經不講音韻俗讀沿襲莫悟其非乃爲徧舉其字分四聲標注示以正讀其無直音者翻切之凡揭出一千二百餘字蓋爲鄉音訂誤也

羣經辨字一卷 鈔本 華長卿撰

是書擇經文中古今異體之字逐加考辨俾各復其舊注曰某當作某其有通用者亦注之大率每字以義爲主以羣籍爲證而援据許氏之書爲多今存一卷惟易與四書完具其他尙有何經以書

已就佚無可考知矣

古文字譜一卷

鈔本

華長卿撰 存

是書每字以今文居首而以古文繫其下其分部依康熙字典以字畫多寡爲先後每部從偏旁之字亦然取易檢也末附奇字偶鈔多疊體或儷體之字音義及所出書俱詳注之

奇字備覽二卷

鈔本

曹景紱撰 存

景紱字方山見曹雲昇傳諸生是書以學僅入塾每因音讀不正坐誤終身乃就鄉音之失師傳之譌者詳爲考正其分卷前以經史子集爲類後以

天津縣新志

卷二十三之一

五

天文地輿人名官名爲類雖未能徧及而簡顯易知可爲讀書之助

四音韻譜

于开撰

等韻述古

樂立本撰

立本字飛泉附樂樟傳

叶韻闕斑

焦景新撰

景新字午橋有傳

韻籟四卷

鈔本

華長卿撰 存

是書爲長卿創作自謂叩音辨韻得喉音五舌頭舌上之音各四半舌半齒音一正舌音五唇外音

四脣內音三正齒齒上之音各四半牙半喉音四
輕齒重齒輕牙重牙之音各三凡得音五十卽以
五十音衍爲五十章每章以入聲括平上去三聲
如岡根更鉤高該哥干之入皆爲各卽以各括之
名各衍章杭痕亨駒蒿孩訶酣齧之入皆爲赫卽
以赫括之名赫衍章也

韻學辨字

查久勤撰

久勤字健菴爲義曾孫歲貢生

左傳輯評

周人麒撰

孟子讀法十五卷

刻本

王又樸撰

存

天津縣新志

卷二十三之一

六

是書簡名讀孟又樸少時見坊行蘇批孟子嘗取
而讀之病其疏舛謂爲僞託老泉乃自以所見箸
爲讀法厥後服官廬州分防無爲政暇與士子論
文輒舉此以爲言濡人喜其說因以鋟板焉書中
先列經文而標明義法於後復爲順說以暢其旨
其末卷爲附錄蓋援引故實駁正朱注參用毛奇
齡之說爲多

孟子讀法附記十四卷

刻本

周人麒撰

存

人麒幼受業洪天錫之門天錫爲之講孟子文法
心有所契自是留心搜輯凡古今諸儒論及孟子

文義者罔不錄存積六十年之力編次成書書中錄天錫及王又樸之言較多於他家而已有所見亦增於後故曰增記人麒嘗主講順德書院其門弟子請以付梓人麒不可越十年卒醵金爲之刊行

四書論文十二卷

刻本

洪天錫撰

存

是書取四子書而論其章法句法字法使人知載道之文卽以文論亦自高出千古蓋士子就學旣求道復學爲文其用心紛而不專惟四子書爲人所誦習就求道之書悟爲文之法一舉而兩得之且孔子贊易曰其旨遠其辭文左氏述孔子之言曰言之無文其行不遠可見道非聖人不能明而明道者舍文莫屬然則讀經而論及文字固無嫌於褻經也

右經部五十八種

左史世系圖考

樂立本撰

兩晉十七國南北朝年表一卷

鈔本

華長卿撰

存

是書蓋以東晉以後南北割據此蹶彼起擾擾者二百八十餘載歲月綿歷統緒芴如而晉書南北史宋南齊梁陳魏北齊周隋各書無一爲年表者

天津縣新志

卷二十三之一

七

乃仿新五代史十國年譜例自晉惠永興元年迄隋文開皇八年列爲簡表纂弒廢立依年編入俾讀史者可以開卷瞭然長卿此著署名長懋其時尙未更名蓋成書於道光十年在李兆洛紀元編刊行之先也

歷代宰相表五卷

華長卿撰

國史儒林傳旁證三卷

鈔本 華鼎元撰 存

是書無著者敘例而以阮元敘文凡例列諸卷首明其爲元原稟也元稟采自載籍連綴成篇凡所引用書俱注本句之下此則一切刪去意在旁徵

天津縣新志

卷二十三之一

六

事實增益見聞不爲原引書籍所囿故其所采或爲本傳所遺然亦有屬稟時旣刪削而此仍錄存者蓋不厭其詳也其諸儒次序後先移易與原稟亦略有異同

尙書眉三卷

鈔本 楊一崑撰 存

是書亦名書史經緯由二典以至秦誓其閒各以年代增入所別見之事蹟陶唐氏以前則雜引古史冠於其上如通鑑之有外紀路史之有前紀而其所據亦以劉恕羅泌之書爲多他如夏小正山海經竹書紀年逸周書穆天子傳以及左遷之文

皆有采焉大旨以緯補經以經綴史既重在史不得
不降經爲乙部之書也

唐宋陽秋五卷 鈔本 華長卿撰 存

是書大旨以五季篡逆相尋得不以正且年祚短促
皆不足以爲國惟朱邪賜姓李氏立功河朔收復京
城徐知誥本姓李氏爲憲宗子孫據有江淮二十一州
尙堪承統故取後唐以繼唐取南唐以繼後唐至宋興
而止始天祐四年終開寶九年凡七十年間事仍錄舊
史而予奪攸分蓋黜魏帝蜀之遺意耳

天津縣新志 卷二十三之一

九

浙西海防彙 劉燾撰

燾字丕冒有傳是書見浙江通志嘉靖閒嘗因寇警起
燾副使兵備浙西燾精奇門風角之術既至郡按圖
覘險選將募兵屢告大捷乃彙輯當時軍書爲一編梓
以行世

張公襄理軍務紀略六卷 石印本 丁運樞陳世勳葛毓琦

同編 存

運樞字少衡埒高菑傳世勳字昱峯毓琦字問渠是書
因咸豐癸丑粵匪犯境及戊午以後海口多事縣人張
錦文有保衛鄉里之功當日設局蒞事

日有記載事平以橐屬運樞等爲之刪削詮定書中詳記城市守望之法財物供應之勞與夫邸鈔劄牘皆實而有徵者也

金剛愍公表忠錄一卷

刻本

金頤增輯

存

頤增字養素光筋嗣子也光筋沒後其家迭遭災難一綫僅延當時表章之文散失殆盡頤增旣長力爲搜集得碑銘傳志哀誄詩詞若干首彙而錄之光筋治行戰績洎乎一門忠烈可以得其大略焉按光筋之沒實由勝保之忌功旣倉卒趣戰又不多與之軍坐觀其敗而不救文人敘論至此多予以曲筆惟歙縣汪宗沂所爲傳贊發奸摘伏極痛快淋漓之致沫河死事得此文可以慰矣

三衛文武兩學優免錄

刻本

是書以國初衛學生員優免丁糧雖奉明詔率由舊章而有司奉行不善仍有鄉約簽派之弊順治四年由道牒請更定牌甲別爲諸生一册六年及康熙十年屢申前例是書蓋卽標注優免姓名式如官册刊板藏諸學署其曰三衛沿舊稱也

津門選舉錄六卷

華長卿輯

津邑歷科選舉錄續錄共一卷

刻本

陳塏輯

存

塏字挹爽舉人官知縣是書一循華長卿之例而增益之自順治乙酉開科以迄光緒戊戌首尾完具足備攷稽惟長卿之書非本籍人不載此則權從寬例如商籍竈籍雖非本縣人亦俱載之長卿所注厯官甚悉此則但書仕至某官至天津科名實始於明正統而紀載祇及於清初則兩書所同也

津邑孝義節烈錄四卷

刻本

採訪總局編輯

存

光緒建元縣人沈兆澐嚴克寬設採訪總局於府城凡府屬有孝子悌弟忠義之士以及貞烈婦女

天津縣新志

卷二十三之一

三

皆可詳告總局歲一彙集具牒官府爲請旌焉至二十四年已旌表者凡十五次時陳塏主其事恐冊籍日積姓名就湮乃爲斯編以章之標名津邑所錄第及津人也前二卷稍載事實其後節孝人多限於篇幅但書姓名紀年數而已

疑年錄小傳三卷

鈔本

華長卿撰

存

是書就錢大昕疑年錄弟四卷及吳修續疑年錄弟四卷所收諸人爲之補輯傳略各爲一卷又自輯一卷名曰增錄但有小傳不載生卒年月其中有爲續疑年錄弟三卷所已收者十人凡其所錄

斷自國初蓋以昭代人文極盛有景行之意焉

劉總憲奏議

劉燾撰

趙僉憲奏疏二卷

刻本

趙之符撰 存

之符字爾合有傳是編輯其傑直吏垣九年間所進條奏凡二十有八篇殆未焚之草也之符立朝敢言言皆可行大興王熙序謂有宣公之愷切無長孺之蠶直可以知其梗概矣熙又嘗爲之符誌墓歷敘嘗所建白者其事日多爲是集所未備蓋前此在戶兵兩垣時所爲先有一集今已不可得此外尙傳二疏一曰請停無益煩費一曰請停部

天津縣新志

卷二十三之一

三

臣差審見武清縣志則又官僉都御史所上者也

徐中丞奏疏八卷

刻本

徐斡撰 存

斡字吟香有傳是書一名吟香書室奏疏前後無序跋亦不署編輯者姓名自嘉慶十九年任江南河庫道卓異謝恩始至道光九年由山西巡撫被劾解任止所有歷年章奏順序排比不加去取蓋其時字內晏安疆吏修明內政故其所奏報不過兵刑錢穀例行諸端而已

蓮峯宦橐

周人驥撰

人驥字芷囊有傳人驥陳臬湖南時甥趙世休適

來省視世杰素從之受學又嘗隨宦親炙最久遂屬其編輯公牘文字與詩集次第刊行之

方輿韻編二卷

鈔本

華長卿撰

存

長卿以當時士夫多不識皇輿郡縣之名著爲此編使之依韻檢字易於知曉書分上下兩編上編列其名分別爲府爲廳爲州縣下編示其統系注明隸於某省某府或某廳州其地名重複及異同多寡別爲雜錄以詳之書成於咸豐三年時李兆洛皇朝地理韻編諸書尙未彙刻傳布此書與之功用相同所謂不謀而合者也

天津縣新志

卷二十三之一

三

北地紀四卷

汪來撰

來字君復有傳是書列入四庫存目其提要略云來官慶陽知府慶陽爲漢北地郡故以名書不分明曰惟以時代先後爲序採事蹟詩文之有關慶陽者得八十一人以后稷居首次以淳維而自埶其名於末其前三卷題來名而四卷獨標北地舉人孫倌撰蓋末卷皆來之文章嫌於自炫故託之倌云

鄒縣志三卷

刻本

朱承命修

存

承命字雪沾有傳是書修於康熙十一年因是年

詔修大清一統志命直省各州縣繕治志乘而鄒縣屢遭兵燹舊志無存承命適宰是邑乃雜采史傳徧搜當代記載補殘訂譌列目凡二十有二書成刊行焉

河東鹽法志十二卷

王又樸撰

是書修於雍正丙午時又樸官河東運同自序謂前志有四大率以郡邑志例志運司未免失體彙纂一書多可采錄然運治篇亦闕入星野疆域而鹽政之要及河東之制特異者轉不之及亦乖志鹽體例乃稽舊牘參時政補略考譌手自訂正逾年而書成時鹽運使楊夢琰吹索斂財與又樸意見齟齬誣以移款修志被劾罷官

盛京通志彙三十六卷

鈔本

華長卿撰

盛京舊有通志乾隆四十四年敕撰至咸豐七年復倡議續修時倭仁爲盛京將軍長卿爲開原訓導遂聘充總纂二月開局從事編輯翌年海防事亟費用告匱甫成書三十六卷遽爾中輟原彙移有司收貯及今數十年存佚難知矣

盛京建置沿革表一卷

鈔本

華長卿撰

存

是書前有序文屬詞莊麗頗類方志篇首之作而

天津縣新志

卷二十三之一

五

書中詳紀盛京所屬府廳州縣及興京吉林甯古塔黑龍江各地歷代分併隸屬之故列爲五表以明之其體例亦與省志相類或卽長卿所輯盛京通志三十六卷之一獨留此槁以備單行者也

天津三衛志十卷

刻本

耒陽胡文璧撰

衛舊無志明正德閒文璧整飭天津始創修之就諮詢所及先自具槁移書編修倫以訓屬其筆削然考明史藝文志載撰者姓名仍書文璧卷首有以訓序文亦不言及纂修事蓋仍文璧所自編訂也書垂成移官去繼任呂盛終其事時在正德十

天津縣新志

卷二十三之一

五

四年板藏分司亭中未幾燬於火萬曆十八年副使彭國光就原書再加修輯分司張常爲之刊行康熙初續修衛志每引舊志爲言蓋猶有存者錢謙益絳雲樓藏書亦有此本至乾隆初已不可見矣

天津衛志四卷

刻本

延長薛柱斗修

存

康熙十二年柱斗兵備天津奉詔繕治志書歷數月而書成時三衛裁併爲一故云衛志卷首列柱斗銜名爲纂修然職官門於柱斗名下盛揚治績不應自炫若此蓋書非自輯特受成耳凡例有云

官職丁地賦役悉循經制凡經廢革者祇載大綱詩文碑記舊志太繁擇簡要者錄之以備參考是舊志爲所芟削遂使前朝掌故多就湮沒然及今猶可窺見一二者尙賴此碩果之存也

天津縣志二十四卷

刻本

仁和吳廷華錢塘汪沆同修

存

乾隆初知縣朱奎揚以衛志疏舛脫漏體制未備且地新政縣規制經始不可無紀載之書乃聘廷華沆同輯縣志開局於丁巳削橐於己未大率詳考史冊旁稽案牘與夫古今諸家之說參互考訂以成此書博洽詳明超軼前箸然新造之邦事有爲諸書所未載者雖心知非妄而亦不之及蓋經生家法出言必求有據也

天津志橐

蔣玉虹輯

玉虹字雄甫有傳是書始於乾隆初元迄於嘉慶二十二年積一生精力遐訪冥搜體質略具玉虹一介寒士力不能多致書卷又不能徵取官牘但憑耳目所及隨手錄存容有疏舛之弊承其後者儻能因端以竟委由略以求詳不患文獻不足徵也玉虹沒其後嗣藏之兩世同治閒續修邑乘乃

天津縣新志

卷二十三之一

三

就其家購得之

續天津縣志二十卷

刻本

吳惠元撰

存

惠元字霖字埶吳景周傳是書接踵舊志迄於同治庚午通商大臣崇厚聘惠元續修卷首修書姓氏列裁定沈兆澐編輯俞樾案樾同治初嘗受聘修志以費無所出未久辭去兆澐由山東歸里年已八十值惠元修志有時就而諮詢初未主其事也蓋全書皆惠元一人編訂自乾隆以迄嘉慶就蔣玉虹所纂者而錄之書中所注蔣彙是也其後五十年事蹟殆得自採訪自序謂無冊可稽者寓

天津縣新志

卷二十三之一

七

書都門與省垣各署詳察迄未見覆歷時旣久勢難再待可見採訪之匪易且亦自知挂漏缺略在所難免也

敬止述聞

無卷數刻本

沈兆澐撰

存

是書類筆記凡二十八條兆澐就養其子維璫山東糧道任時年已八十餘瞻念鄉國條舉舊聞以餉來者厥後吳惠元續修縣志但錄故事於所論志例如建置沿革職官選舉宜用表山川關隘繪圖宜用開方法及經政藝文宜詳宜略諸說不盡從也

敬鄉筆述八卷

鈔本

徐士鑾撰 存

士鑾字沅青見徐炘傳士鑾中歲歸田潛心撰述尤以鄉邦掌故爲重凡有關於文獻者雖片詞隻字罔不手錄輯存以備後來再修縣志及續纂津門詩鈔之助凡二書所闕者補之譌者正之徵引繁富而附以己見頗類考訂家言士鑾素不滿意於同治續志時有指摘分見各篇更羅列錯漏者數十條彙爲一卷繩愆糾繆殆吳氏之諍友也

津門徵獻詩八卷

刻本

華鼎元撰 存

是書蒐輯鄉人事蹟大旨以忠孝爲先次及宦績

天津縣新志

卷二十三之一

三

學行文苑隱逸末卷則專收烈女凡得一百二十人人各繫以詩而以傳志行狀及諸家文集所載瑣聞軼事羅列詩後雖云徵獻實賴考文其體製類於近人南宋雜事詩而表章先獻則又人物志耆舊傳之遺悒也書成於同治初元自咸豐以上至於有明凡知名之人大略備於是矣

海光寺志八卷

釋成衡撰

成衡字湘南嘉興錢氏康熙閒總兵藍理延主普陀寺海光爲 仁廟賜名志卽成衡所輯也

香林史略

王聰撰

聰字玉笈號野鶴初爲天妃宮道徒後隨其師創建河北香林院遂爲香林院道士是書歷述締造之維艱守成之不易冀使世世傳藏共相惕勵龍震與聰結契最早老而彌篤書成故爲之序

畿輔人物表一卷

鈔本

華長卿撰

存

是表縱以歷代爲次始於兩漢橫以各府爲次始於順天凡得名臣碩儒節義文學之士二百五十六人書無序例不知去取之意以何爲準亦不知其書爲完爲闕或者依表爲傳尙待編輯此特其目錄耳

天津縣新志

卷二十三之一

三

沽上陽秋一卷

華長卿撰

津門通典八卷

華鼎元撰

路史

畫史

黃謙撰

謙字六吉有傳兩書俱佚其名見張霏文集蓋謙隨張國寯入蜀時紀游之作故霏謂山水花鳥之奇人情風俗之異余雖不得親見可於六吉之書見之矣

游盤日紀一卷

刻本

查爲仁撰

存

爲仁字心毅有傳是書爲蔗塘外集之一乾隆庚申二月爲仁與朱岷陳皋陸宗蔡同游田盤三宿

山上時當餘寒未解六出猶霏躡磴穿林別饒異
趣記中頗以游盤看雪爲獨得之奇爲仁紀游詩
已載山游集此則記往返九日之事而以同游諸
人詩句附載其閒焉

天台雁蕩紀游一卷

鈔本

金玉岡撰

存

玉岡字西崑有傳是書逐日紀程分段寫景以文
爲主附之以詩前有許佩璜高綱王樾諸序皆賞
其敘述之工蓋游記體也梅成棟輯津門詩鈔但
選雁蕩詩而繫各記於後迨金漢鐫黃竹山房詩
鈔更併詩後各記別爲一卷棄取分合舊製全非

天津縣新志

卷二十三之一

三

自此編失而復得始覩廬山真面矣

田盤紀游一卷

鈔本

金玉岡撰

存

是書體製與前書相同但天台雁蕩爲其初游故
紀載詳此則爲第六次游盤其所入錄者特一時
情景耳然餉蔬拾橡贈畫題詩處處與僧衲爲緣
尤具出塵之致

田盤記

金勝撰

勝字嶺雲玉岡從兄子坵王玉璋傳

黃山紀游一卷

鈔本

沈銓撰

銓字季掌坵王玉璋傳馮金伯國朝畫識謂銓生

平慕黃山之勝己未秋偕程音田考功至歛與莫山人葵齋裹糧同游則是編之作當脫稟此時曩者華氏藏有鈔本今已失

河工摘要

蔣玉虹撰

篷窗隨錄十四卷埵錄二卷續錄二卷

刻本

沈兆澐輯

存

是書爲兆澐官江安糧道時所輯督運往來舟中無事就行篋所攜書籍繙閱鈔撮積久成帙其所采掇皆有關國計民生而尤詳於河運漕政及畿輔水利大率出諸名臣章奏前人著作錄其全文

天津縣新志

卷二十三之一

三

不加刪削惟埵錄二卷稍變體例略如說部摘取舊聞閒及瑣事蓋游於藝之意也光緒甲午十一月 上命南書房進書三種是書居其一先臣遺箸不由奏進而得邀睿覽時論榮之翰林院侍讀王懿榮爲文恭紀恩遇冠諸卷首

津門保甲圖說七卷

刻本

存

是書不載編輯人姓名前後亦無序跋版存藩署蓋官書也當道光二十年海氛不靖英船駛至大沽口外大吏以禦敵必先防奸檄行保甲編察之法設城鄉義民局八十所以資守望事平彙爲是

書首錄布告文移及海防善後條奏爲一卷其六卷則分載各圖圖以數村爲一幅各村簡說並詳記戶口之數繪事工緻槧印亦精

聖廟崇祀圖考二卷 華長卿撰

樂譜二卷 華長卿撰

古藝文志二卷 華長卿撰

今藝文考二卷 華長卿撰

姓函 焦景新撰

千家姓三卷附華氏姓數目錄二卷 鈔本 華長卿撰
存

天津縣新志 卷二十三之一

三

長卿以姓氏之學古今多有成書然皆不便於記誦惟宋人采真子千姓編以四字爲句聯以音韻文義相屬今此書不傳乃仿其體爲四言韻語集成一千六百四十姓因明洪武時嘗據戶部黃冊編千家姓以進遂襲其名每姓雜引書籍以爲證曰集注後有補遺及拾遺又得姓五百餘複姓三字姓四字姓又共得五百七十餘又附備考者四十二字各有集注以釋之惟複姓闕如姓數目錄蓋用以檢前書之字冠以華氏者別於前人之姓藪也

介山年譜一卷

刻本

王又樸撰 存

又樸因世俗士大夫家往往好爲行狀以表揚其親而不知譽之過甚適以自誣乃詮次生平行事自訂年譜以示子孫美惡並書雖極過失亦不隱飾以爲世無無過之人既能改焉尙何不可告人耶

年譜一卷

刻本

沈峻撰

存

峻字丹崖有傳峻卒於嘉慶二十三年戊寅而其自著年譜卽於是年脫槁蓋書成遂爲絕筆焉子兆澣輯注刊行

天津縣新志

卷二十三之一

三

查初白張船山年譜二卷

華長卿撰

采芳隨筆二十四卷

刻本

查彬撰

存

是書殆仿宋人全芳備祖明人羣芳譜而擴充之書名采芳故以花部居首其草木穀蔬之類凡爲植物者分爲八屬彙集於後都八百七十餘種凡花有實者列其實爲埒見名不甚著者則隸於同類之下爲埒錄又得七百餘種每種廣稽其名詳識其形狀與其性質而以古今人之題詠繫之崔龍見張灼兩序皆極稱博雅

畿輔碑目二卷待訪碑目二卷

鈔本

樊彬撰

存

彬字質夫有傳是書自序略謂畿輔古刻散見諸家著述者甚多而近年出土又時有見聞其埋棄榛莽閒者更不知凡幾不有紀載將使日就淹沒重爲可惜乃卽耳目所及之現有碑刻錄目彙存自周至元凡得一千五百數十種舊籍所書世鮮傳本者概歸待訪埵錄於後時獨山莫友芝同客京師善其所爲更冀其仿關中金石記山左金石志之例編纂成書而書其意於簡端以勛之

石鼓文存一卷 鈔本 華長卿輯 存

是書無序跋每鼓各摹其文而詳記存滅字數於

天津縣新志 卷二十三之一

三

後長卿客金陵時有陳氏以家藏石鼓搨本求題是書所記十鼓今存字數卽指陳氏本而言蓋明搨本也

漢碑所見錄三卷 鈔本 華長卿撰 存

是書見文集凡三卷今存一卷

金石文徵四卷 華長卿撰

泉譜一卷 鈔本 華長卿撰 存

是書見文集凡二卷今存一卷書中所摹錢式以時代爲次由周至五代而止後埵刀布異布及奇品外國品不知時代品並壓勝錢不似未完之書

凡增錄者多引文卿說文卿者鄉人樊彬字也

古泉叢考四卷

鈔本

徐士鑾撰 存

是書爲藏雲閣識小錄之一首卷總論幣制次三卷詳考歷代貨泉始於周景王至唐咸通而止博引旁徵有時增以己說士鑾與鮑康同官內閣俱嗜此學互相研究其後出典外郡仍以搨本往返贈酬復示以李佐賢古泉匯戴熙泉話聞見日擴收藏亦富故此箸俱有依據也

吉金壽石齋古泉譜

周士澄撰

士澄字小耘官知州

天津縣新志

卷二十三之一

三

史腴四卷

查日乾撰

日乾中年迭遭患難每當鬱悒之際輒覽書史以自寬其於二十一史見有忠義孝友廉節卓卓表見者手自錄掌積久成帙自序謂歷代制度文獻之大有三通諸書攬其全若摛藻揆英則史漢南北史又皆有選摘之本茲編雖不足語於箸述而雷同之病幸而獲免存之家塾用訓後昆蓋其編輯時年已七十三矣

祥孽錄一卷

鈔本

張廷綬輯

存

廷綬字子珊廷選弟諸生是書擇歷代史中五行

志所載災異之事凡爲禍福朕兆而顯然有驗者彙錄一編爲省躬反己者之助其命名則取中庸禎祥妖孽語使人知警畏也

左國評萃六卷

郭錫撰

史記七篇讀法二卷

刻本 王又樸撰 存

又樸以世儒每謂史公能文而不知道箸爲此編以見道卽在文史公才識俱高班固重貨殖輕仁義之言未爲篤論七篇者項羽本紀外戚蕭相國曹相國各世家淮陰侯李將軍魏其武安侯各列傳也其獨取此七篇者以後學多誤解特爲標其

天津縣新志

卷二十三之一

三

義旨舉此以概其餘也又樸初執贄於方苞苞爲講蕭曹二世家義法則此箸殆亦衍師傳耳

史記約錄評解

周人騏撰

國朝史論彙十六卷

鈔本 張大仕輯 存

是書於國朝諸家文集中選其論史之作純粹可法者彙爲一編其分類曰總論曰君論曰臣論曰史事論曰雜論曰書後各類中以臣論爲最多史事論次之蓋雖雜選亦史論之大觀也

駢體鑑略一卷

刻本 吳士俊撰 存

是書彙括諸史約爲四言韻語授諸家塾俾學僮

習之略知梗概他日讀史不難因端竟委以求其
詳里人善之往往取以教其子弟遂爲通行讀本
矣

史駢箋正四卷

鈔本

華長卿撰 存

是書爲大興徐鑑原著仿十七史蒙求體例撮舉
歷代帝王事蹟順其朝代綴爲四言韻語長卿引
史文箋釋之書存四卷至唐憲宗而止殆非完本
也

右史部七十二種

聖諭廣訓衍十六條

刻本

王又樸撰 存

天津縣新志

卷二十三之一

三

又樸佐運河東時方頒行聖諭廣訓朔望宣講著
爲功令惟鄉氓未諳文理往往稱名指物聞者茫
然又樸乃以俚語方言推衍其義使人易曉脫橐
於雍正四年距頒行不過兩載成書最早後來凡
有以白話解演者大率就此橐而修飾之也

資鏡錄二卷

刻本

沈峻輯 存

峻年二十時隨宦廣豐讀先正格言隨筆鈔錄取
備考鏡積久成帙其子兆澐爲之校刊奉爲規訓

竈嫗解一卷

刻本

沈峻輯 存

峻歸里後輯是編以訓諸子者所錄皆先正格言

淺近易曉而生平閱歷所得亦坳焉

懋思錄一卷

刻本

樂立本撰 存

立本一生學行得諸母教者居多既失恃哀思不已乃最其母氏生前言訓及行事爲言行紀略都六十六條舉凡事尊章相夫子睦姻族御僕婢以及莅事之明敏待人之慈祥瑣細不遺隱微必達坳以南游草共爲一卷統名懋思錄母賢子孝得此並彰矣

義利法戒錄二卷

刻本

沈兆澣輯 存

是書采取古來言義者之言與言利者之言各爲

天津縣新志

卷二十三之一

三

一卷使人對勘自知其是非其閒言義言利多屬一時互相辨駁之詞如涑水眉山諸賢之於熙甯新法是也兆澣此箸蓋欲置諸家塾使士子讀書時卽已確然知義利之分庶他日涉世應務不爲邪說所惑殷殷有端本清源之意焉

戒訟說一卷

刻本

沈兆澣撰 存

是編爲兆澣守江甯時告誡之文分列十條每條反復申諭好訟之害復引律例以警之其後退老鄉里更以此說上諸大吏行下所屬州縣轉相勸告蓋十戒中惟投河告狀一條或不常有餘俱瀆

習所同法網易觸者也

耄學齋碎語一卷 刻本 楊光儀撰 存

光儀字香吟有傳是書爲其晚年之作所載皆閱
歷有得之言足以爲教戒者義善取譬語多用駢
雖曰短句零篇要亦子部之具體也及門徐士鋈
嘗刊於浙中印行無多而板已失

論學書一卷 鈔本 嚴克寬撰 存

克寬字仁波有傳是書輯其與人論學之言爲一
編其大旨在內明心性外見事功非空談名理者
可比克寬生平以寡過爲期而好義行仁終身不

天津縣新志 卷二十三之一

三

倦殆所謂不負所學者也

藝軒主人家書十卷 槧本 陶喆姓撰 存

喆姓字濬愚埒陶雲升傳喆姓嘗客奉天一年館
京師八年家貧親老時以書札往來處分家事並
教兩弟以讀書作字之法持身涉世之要勸善規
過義嚴理明往往一牘千言娓娓不倦甲午以後
更以新學相勸殷殷屬望旁及友朋喆姓年甫四
十而沒一生學識之優性情之篤俱於茲編見之
祝融佐治真詮十卷 刻本 吳士俊撰 存

是書以道光之季海疆多故舊時火器苦窳無以

禦敵而西人利瑪竇湯若望等傳入之說猶有述者近人丁拱辰汪仲洋龔振麟丁守存輩復能有所闡明以之製演新器多有明效士俊乃仿明戚繼光練兵實紀例搜集中外書籍擇要取長由鍊冶製造以逮運掉之術攻守之用表裏分合各爲圖說雖陳新參半而理化測算形重諸學已略寓乎其中矣

捕蝗備要十條

刻本

沈兆澐輯 存

兆澐守江甯時因蝗蝻最易致災輯此備用蓋救災必求簡易僅於舊法中擇此十條已足致效視

天津縣新志

卷二十三之一

罕

牧令力行何如耳

醫鏡

刻本

蔣儀撰

儀字無考有傳

藥鏡四卷

刻本

蔣儀撰

是書列入四庫存目其提要略云是編前後無序跋惟凡例謂醫鏡之鑄駢車海內今梓藥性仍以鏡名其載藥性分溫熱平寒爲四部各以儷語括其主治後埒拾遺疏原滋生三賦以補所未備案儀進士題名碑作天津衛軍籍提要謂儀嘉興人或其原籍也

素問解

靈樞解

洪天錫撰

兩書已佚王又樸嘗謂其所著能自出手眼不拾前人牙慧見詩禮堂集

補注瘟疫論四卷

刻本

洪天錫撰

存

天錫著書每自署鴛湖蓋其先本浙之嘉興人猶張霏稱驪城胡捷稱稽山雖家天津不忘舊籍也昔明人吳有性值崇禎大疫俗醫誤以傷寒法療之乃著瘟疫論以辨明瘟疫與傷寒異治其法迥然不同天錫殫精醫術乃取其書依次注之羅列眾誼參以己見推闡詳明益成善本讀者遂徑稱

天津縣新志

卷二十三之一

聖

洪吉人瘟疫論忘其爲有性原書也

痧症傳信方二卷

寇蘭皋輯

蘭皋字露滋有傳

醫方叢話八卷

刻本

徐士鑾輯

存

士鑾涉獵羣書尤喜讀古今說部爰效陸宣公忠州故事凡各紀載有涉及岐黃之術論病評藥近於醫案與夫舊傳良劑備用單方歷有明驗者隨筆錄存積成斯帙雖云雜俎亦自詳贍可觀蓋其功用足以濟人固不僅資談助已也

開方粹一卷

石印本

楊承烈撰

存

承烈字藕舫埭楊家麟傳是書以朱世傑四元玉鑑所列古法七乘方圖華蘅芳悟爲古開方法然其所箸開方古義僅列一數二數正負四表若遇多數之根仍窮於用乃依其術補列三數至十數表八大數小數表各一公式正負表各一凡天元諸乘方代數各次式以及方積求邊直積帶縱淺縱各數按表推求簡捷無比其及門爲付石印以行之

代數便記五卷

鈔本

高炳辰撰 存

炳辰字煥卿舉人官知縣是書自序略謂算之有

天津縣新志

卷二十三之一

聖

代數本非難爲之事自各書以華文譯西語文義不免艱澀則算理反爲文理所掩因就所演習者旣布列其式復申明其法各以七言括之但期理之易解不嫌詞之不文題曰便記蓋以矯算書難讀之弊也

瑞安算書三卷

彙本

華學瀾撰 存

學瀾字瑞安埭華金壽傳學瀾之算長於元代嘗取益古演段之六十四題以代數演之爲益古演代細草一卷又嘗衍算九十餘草手錄習題五百餘問合爲算存一卷其中開立方一草可訂代數

術開雜立方用迦但法之誤又通考差分辨誤一卷蓋以無定方程推算而實會通於百雜術衍者也

春秋繁露求雨止雨篇考定一卷刻本王又樸撰 存

是篇從江甯周槩校本摘出加以考證附詩禮堂集內又樸在關中見有以董子之法求雨止雨輒應及來江南於無爲及徽州行之者三亦俱有驗乃上書江督尹繼善力陳其益復刻此以冀人踵行之也又以無爲江壩屢圯推演繁露之意建土星祠與支水亦有效詳列其說及祠記附諸後

天津縣新志

卷二十三之一

星

地理元顯二卷鈔本余作恭撰 存

作恭字蕭齋廩貢生附余堂傳是書上卷釋宋陳搏天玉外傳下卷釋元僧幕講金口訣而附以四龍八極辨元空祕要錄堪輿必讀書目其自序略云端木太鶴著元文於天玉揆星之祕已洩盡所引古書隨引隨注而於外傳爲尤詳第文義散見未易窺尋學者每以深奧置之故卽所引注彙錄於本文之下而於每節標其大旨以爲循途入室之資

甕虛齋觀帖錄

李友太撰

友太字仲白有傳

曠真精舍觀畫錄

李友太撰

書法偶集一卷

鈔本

陳玠撰

存

玠字石汀埭陳應夏傳是書摘取古今論書之語及已有所見隨筆條記凡得一百餘則其有書家故事不專論八法者亦埭及之梅成棟謂玠書師陳奕禧與之神肖故書中稱奕禧書法正而力適然於所書育嬰堂碑謂其輭媚無筋骨此外則稱引傅山之說最多無一異辭蓋服膺之意尤摯焉

養素軒讀畫記八卷

鈔本

沈銓撰

天津縣新志

卷二十三之一

罟

是書亦名師橋讀畫記銓嘗往來南北以畫見重一時風雅之士多樂與之游客京師時貝子弘昉尤相契合是書蒼萃生平所見名畫就一家所藏者各錄爲一卷瑤華道人卽其一至末卷則雜收而彙記之詳述障幘摘錄跋識加之以考訂斯雖論畫通例徐士鑾謂其文筆之清識解之真非他家所及也

南宗抉祕一卷

鈔本

華琳撰

存

琳字夢石埭王玉璋傳琳嘗謂自來畫師恆緘祕其術不以示人雖王維荆浩郭熙各有訓述然所

論僅及形質而用筆用墨之真訣不傳博考湛思萃二十年之力悠然神會遂得其妙此書實補前人所未發也

銅鼓書堂藏印四卷

印本

查禮鑒定 存

禮字恂叔有傳生平喜藏秦漢銅印積多至六百有奇子淳復增益之乃視時代之先後官爵之崇卑姓名字數之多寡排比成譜官印自侯將軍督以及蠻夷之屬私印自朱文小印以至及篆日利龍虎蟲鳥諸文靡不備焉丹徒王文治大興翁方綱各爲之序

天津縣新志

卷二十三之一

墨

野田印宗

金銓撰

銓字鈞衡野田其號也有傳是書見汪啟淑續印人傳

養素軒印譜一卷

沈銓撰

是集前有邵玉清序謂銓好古力學澹於名利觀其藝之精想慕其人之雅高詰後跋謂銓篆刻奇古者十之三文雅者十之七蓋皆少作故引鄉前輩周焯所論摹印法以勗之

紅椒館印譜

解道仔撰

道仔字鐵樵見解秉智傳少嘗學摹印於沈銓銓

示以多讀書歷覽名山大川浸淫於鼎彝文字氣味自殊道仔用力甚勤藝事猛進後質所刻印於其師銓大賞之遂爲之序

草木名印譜二卷

印本

趙埜撰

存

埜字雪蘿有傳是書亦名楮葉集前有楊霞序及埜自序蓋埜欲傳其篆刻以漢印無閒章又不欲藉今人以傳而託名古印則又嫌其作僞乃博稽羣籍擇草木名之首一字爲古今姓氏所有輒取以爲印文視之頗類私印其有若官印者亦采之雖云遊戲而實有獨造之概焉

天津縣新志

卷二十三之一

異

藝菊法一卷

鈔本

張葆忠撰

存

葆忠字厚菴廷綬孫布衣是書列培土蓄肥等法凡十二則爲養菊要訣蓋皆得自經驗者也

參禪譜二卷

刻本

閆智撰

存

智字明陽是書取舊傳牙牌參禪法演習之布爲十五式以盡拆合之妙質諸其友徐步芸步芸爲增益三式其戚劉道三又增益六式蓋奇偶相生術而通於數者也

七巧集成八卷

周承基撰

承基字梅巖國子監生官通判是書蓋以里俗所

行七巧圖不過僅作冠裳鼎彝昆蟲草木之形承
基變爲文字得韻語楹聯各若干則點畫波磔多
饒奇趣又以友人所作彙爲一編故名集成

詩禮堂雜纂二卷

刻本

王又樸撰

存

是書隨筆條記未加詮次然所載如經說史論語
錄格言故事小說以及格致考訂之學殆無不備
既采成說亦抒己見又樸一生學術洎通籍以後
見知於方苞朱軾沈近思孫嘉淦尹繼善輩師友
淵源約略見之矣

嘉言編八卷

王紹慶撰

天津縣新志

卷二十三之一

畢

紹慶字無考諸生

庸行編八卷

刻本

牟允中撰

存

允中字叔庸是書列入四庫存目其提要略云允
中書因揚州史典願體集而參補之皆先正格言
分門編輯自達觀以至警醒凡三十三類每類採
輯數十則大都取其明白顯易可以訓俗化愚其
立教類有允中自著讀書之法兼論及時文蓋以
訓其家塾子弟者也

警睡編四卷

刻本

華椿輯

存

椿字榮萱副榜貢生官知縣生平喜讀格言嘗錄

置座右以資反省自謂歷宰繁劇幸免罪戾者實得力於此乃彙輯舊鈔區爲四類刊行之蓋以自警者警人也

過庭述聞一卷 李春城撰

春城字築香有傳

幽冥錄十卷 蔣玉虹撰

是書采輯鬼神報應之事甚博以寓勸懲嘗有笑其迂誕者玉虹毅然爭之曰大易言知鬼神之情狀是鬼神不惟有情並有其狀聖言豈欺妄哉

宋豔十二卷 刻本 徐士鑾撰 存

天津縣新志 卷二十三之一

吳

是書分門標目略仿世說新語以其取材宋史而其事又限以婢妾倡伎故題曰宋豔大旨蓋以世人情欲之私最易毀名墮行而古人亦往往於此見其真操書內於所引各條下每證以歷朝事實或綴以先正法言冀使閱者有所警惕力戒儇薄之習用意良厚其師楊光儀序以行之

勝區文徵四卷 鉛印本 楊家麟輯 存

家麟字小雲嘉林其號也有傳是書采掇有明一代說部彙爲一編不分門類亦無義例自序所謂有得輒書不復編次者也其曰文徵蓋以瑣事謏

聞必求諸稗官野史雖云小說要亦考鑑之資耳
簪花小記一卷 張廷選撰

是書已佚惟治堂詩集存其題辭七律四首玩其
詞旨感傷懺悔蓋亦余懷板橋雜記之屬也

歷代紀原

胡捷輯

捷字象三有傳是書先紀歷代帝王世系所有傳
襲位次禪篡廢立罔不表而出之爽若列眉而於
建元改元建都遷都廟諡陵寢以及卽位之甲子
享國之歷數后妃之姓氏尤加詳焉又以先王開
物成務制器尙象皆有造始之端卽皆有關於治
亂興衰之道故凡一事一器必標明始作之因起
於何代何帝使讀史者執是以爲綱領庶沿革興
亡之跡可以心目了然也

原始彙鈔一百三十八卷

鈔本

張夢元撰

夢元字蓉軒有傳是書隨筆條記專詳事物所自
始殆卽宋人事物紀原明人原始祕書之屬凡分
門五十有八都一千七百八十三則成書於光緒
癸未時夢元年將六十蓋一生精力之所在也

羣書集腋

樂立本撰

多識類鈔

焦景新撰

天津縣新志

卷二十三之一

晷

十斛麥一卷

鈔本

楊一崑撰

存

一崑教授河東時以爲行文之法必先儲材館課餘暇喜出經傳成句以意連綴俾生徒屬對積久成帙存諸篋中復以教其子恆占而益廣之凡三萬三千餘言統以十類俾詞有所隸篇各成文題曰十斛麥蓋取菽粟之意爲日用所必需且可播種以多穫也

四字類賦二十七卷

刻本

張師載撰

存

師載字無考是書以坊行廣事類賦引典多僻屬對未工字錦駢字類編諸書音韻不諧難資口誦

天津縣新志

卷二十三之一

五

因采取典故之明顯者括爲四言儷語分隸二十七類按韻編次韻皆實押可醫初學輒腳之病

數典二卷

鈔本

張大仕撰

存

是書以數爲綱不分門類經錄成句史舉故實各依經史次序爲先後而詳注所出書於下取便檢閱蓋仿小學紺珠讀書紀數略諸書略變其例者也

右子部五十一種

天津縣新志卷二十三之一終

天津縣新志卷二十三之二

藝文二

蘊古書屋詩文集

張愚撰

愚字若齋有傳

晴川餘藁

劉燾撰

倪相如詩集

倪光薦撰

光薦字相如見倪尙志傳是集爲其晚年所刊前有靜海高恆懋序謂光薦與其父爾儼同官京師每談詩文亶亶終日政暇輒手一編不輟吟詠其詩高華典貴爲北地不爲竟陵及以罔卿在告時色亦可謂性情於斯道者矣

天津縣新志

卷二十三之二

一

拙菴文藁

徐兆慶撰

兆慶字章芸埭徐兆舉傳

紀游集

徐兆慶撰

梅成棟謂兆慶詩規盛唐氣骨沈雄英姿颯爽有裊鄂飛動之勢非竊襲面目者比

怡齋文集

趙之符撰

厯下吟一卷

太行行草一卷

俱鈔本

黃謙撰

存

是集在乾隆初修志時云已無存迨梅成棟輯津



門詩鈔就訪於其家乃出此二卷皆有張霏評點大喜過望遂編錄入集卽今津門詩鈔所存之三十九首也今華氏藏其詩一卷較成棟所輯多八首皆客山左右時之作前後有成棟跋識蓋卽當日鈔錄之本但不知爲謙完稟否也

搖鞭草一卷

徐孫森撰

孫森字亭玉詳徐輝傳孫森宰長山三年民戴其德及去任百姓攀留如失所依其事俱於是集見之

致遠堂詩草四卷

鈔本

金平撰

存

天津縣新志

卷二十三之二

二

平字子昇詳金玉岡傳平原籍會稽嘗攜先人旅櫬返葬家山長途濡滯累月始達旣抵鄉里敘離別之情修任恤之誼與夫山居況味一一形諸詠歌故集中南游之詩多而居津所作者轉少末埒文一篇詞十數闕家訓數則家訓有劉鐸注釋鐸字鳴遠以孝行著見人物志

玉紅草堂詩集十六卷

刻本

龍震撰

存

震字文雷有傳是集錄其分體詩五卷編年詩八卷南游日記及游山水詩各一卷雜文一卷題曰玉紅草堂玉紅草生崑崙圃食之醉三百歲震嗜

飲故取以名所居因以名其集文安陳儀謂震不得志於世鬱而爲詩其遇窮故其音悲其痛深故其詞婉其刺冷故其指微溫柔而敦厚纏綿而悱惻庶幾屈子之遺焉自康熙甲戌至癸巳凡得詩四千餘首其甲戌以前詩悉芟去嘗謂詩者志也前此志猶未定故其詩亦不欲存也

東溟又存橐

龍震撰

震自刻集後再有作隨手棄去久之乃從弟子請以其所爲游歷詩彙爲一帙題曰又存橐嘉興錢陳羣爲之序

天津縣新志

卷二十三之二

三

遂閒堂橐

張霖撰

霖字汝作有傳是集自其家被籍時已散失其元孫虎士編輯家集僅存詩一首梅成棟復於弋蟲軒詩集中得其詩二首同錄入津門詩鈔

綠豔亭詩文橐八卷

鈔本

張霑撰 存

霑字念藝有傳是集爲其康熙甲子迄於辛未八年間之作詩文分年編錄各爲一卷其甲子以前詩橐悉燬於火雖有追憶所存亦尠蓋存詩最多者莫過斯集梅寶璐楊光儀各有選輯將以付梓事阻未果集中辛未年所作亦名詩星閣集張弓

爲之序自己巳以後又名泣萱樓集蔡疇爲之序
綠豔亭殆其總名也

弋蟲軒詩一卷

張霏撰

是集曩爲陳鼎元所藏名曰弋蟲軒焚詩重錄略
梅成棟猶及見之蓋被燬後追錄之稟甲子以前
之作也後楊光儀復見之於樂氏家今不知所在
矣

讀晉書絕句二卷

刻本

張霏撰

存

霏以讀書太易往往過而輒忘故於晉書每讀一
傳必涵泳史文紀以歌詠積久得絕句三百八十

天津縣新志

卷二十三之二

四

餘首彙爲一集霏尙有讀漢書絕句沒後俱佚光
緒初李其光得此集於書肆徐士鑾借鈔刊行之
梅寶璐爲之序

欵乃書屋集二卷

刻本

又一卷

稟本

張霏撰

存

是集今存二本一爲徐大鏞所藏其族弟士鑾取
以付梓分爲二卷以詩考之當是甲戌年稟其一
爲華長卿所藏則乙亥年作也霏詩分年編錄綠
豔亭集至辛未止是集起於甲戌其閒二年詩不
可考矣華氏藏本爲霏所手鈔且多改竄字畫迥
逸似一人書徐氏僑寓河南原稟存其家中

秦游詩一卷

張霑撰

霑甲戌年詩已編入欵乃書屋集是年冬省兄陝西得詩一卷題曰秦游時蒲州吳雯亦客關中遂相歡聚為序其集今集雖已佚而西征登華諸作見諸家集尚存二十首

帆齋逸藁

張霑撰

是集屢見記載但書已佚為詩為文無由考知姑附此

嘯竹軒詩草

梁洪撰

洪字崇此附張霑傳

天津縣新志

卷二十三之二

五

誦芬堂詩集

刻本 沈起麟撰

起麟字苑游附沈鵬鳴傳是集有沈雙龍江鯤書後雙龍謂起麟少受業於其祖支柄累舉不第遂棄舉業一肆力於詩鯤謂其詩春容大雅音節和暢藹然如覩其人洵詩家正則也

閒閒齋集

童葵園撰

葵園字蘭風附龍震傳是集會稽傳王露為之序

珠風閣詩草六卷續集一卷

刻本 查曦撰 存

曦字漢客附張霑傳生平客游所至最喜款接名流臨眺風景時以清詞麗句寫其幽逸之懷集中

第五卷專錄榆關至東北絕塞之作每詩詳注其事探幽歷險志怪述奇讀之等於風土記故亦名東荒薄游草其續集爲朱函夏及嘉興許王猷所選定務約而精故僅存一卷

蘭亭詩鈔一卷

查爲政撰

爲政字漢公於曦爲弟親疏莫考家貧託跡公門而耽於詩王又樸謂其長吟短詠無不入格是集前有又樸及周焯朱函夏梅瑾諸序

梅東草堂詩藁四卷

刻本 顧永年撰

永年字桐村浙江仁和進士官知縣康熙閒移家

天津縣新志

卷二十三之二

六

天津是集板旣零散庚子兵劫書亦遺失今惟舊志存詩二首

讀書舫文鈔一卷

刻本 胡捷撰 存

是集存文二十三首同治閒其裔孫柄泰求序於沈兆澧趙新而刊行之兆澧序謂醞釀經史獨抒心得於顯微闡幽表章忠孝尤三致意焉新亦謂捷文有關世道人心雖少卒不可廢捷順天諸生而家天津其自署稽山者不忘祖籍也

讀書舫詩鈔一卷

鈔本 胡捷撰 存

查爲仁蓮坡詩話謂捷十歲能詩與共筆硯者三

十年故水西莊倡和之作見於兩家詩集者甚多
是卷爲其裔孫承勳所錄欲刊行而未果詩僅一
百二十餘首而析爲數集甚有一集祇一題者其
閒似有離合去取非原藁也捷生平所爲詩尙多
今胡氏式微遺箸蕩失此特其碩果耳

江上吟一卷

鈔本 胡捷撰

康熙壬寅捷嘗挈友南游由河入淮渡大江攬金
焦北固之勝止於吳郡探太湖兩洞庭之鉅觀又
嘗泝江抵金陵六朝遺蹟恣其眺覽興之所至遂
有歌詠凡得詩百篇都爲一集自序謂因貧而游

天津縣新志

卷二十三之二

七

游而仍貧大率感慨抑鬱多思親憶遠之作非壯
游愉快之音也

喚魚亭詩文集

張坦撰

坦字逸峯埒張霖傳坦曾孫虎士輯家集時嘗謂
坦晚年詩皆就散逸蓋卽指此集而言然家集所
錄坦詩數十首有家難以後之作又有句云閭族
推吾長則是晚年詩猶有存者特此集之子遺耳

履閣詩集

刻本 張坦撰

是集爲其少作今亦不存所存者惟姜宸英一序
耳宸英謂其詩飄渺雋宕絕類太白又謂坦嘗訪

友渡江歷覽金陵吳會之勝得詩近百首今家集中載其南游詩三十餘首蓋卽此集所有旣散佚後由其曾孫虎士搜輯而得者也

秦游詩一卷

張堦撰

堦字聲百埭張霖傳霖官陝西驛傳道時堦嘗往省覲故有是作詩成以寄姜宸英宸英序謂辭義飄渺恍惚若不可測寄興所在求之嗣宗以下射洪曲江以上各有磊磊不可磨滅者今原稟已佚遂閒堂家集存詩一卷命題多在關中當是此集但全錄原稟抑別有增刪無可考知矣

天津縣新志

卷二十三之二

八

可亭集四卷

金大中撰

大中字馭東平子諸生

燕平存草

于揚獻撰

揚獻字擢溪埭于京傳

居易堂詩藁

周人龍撰

人龍字雲上有傳

香遠堂詩鈔八卷

刻本

周人驥撰

存

是集爲其甥趙世傑編校刊行其詩始於游晉迨通籍後督學西川典試八閩及以御史巡視南漕王事賢勞不輟吟詠莅湘稍久篇什較多然集亦

止於此厥後迭掌封圻罷歸田里不無續作而稟
之存佚不可知矣人驥有文數首以不足成帙遂
附詩後

保積堂詩文全集

周人麒撰

人麒詩文俱有定本惜未刊行今津門古文所見
錄存文十五首津門詩鈔存詩十四首

偶存草堂集

趙松撰

松字泰瞻歲貢生

朱谷齋遺詩四卷

刻本

朱函夏撰

函夏字乾馭谷齋其別號也附朱承命傳函夏沒

天津縣新志

卷二十三之二

九

後子孫式微詩文散失越二三十年吳人驥始得
此稟莊寫成帙俾周人麒序以行之梅成棟輯津
門詩鈔選其詩三十餘首蓋猶及見此集也其後
華鼎元從書肆中檢得函夏觀海集一卷存詩六
十首謂斷簡殘編愈足寶貴則是谷齋全集刻本
又就蕩失故以所得爲幸也

卜硯山房詩鈔一卷後集一卷

刻本

周焯撰

存

焯字月東有傳乾隆辛酉焯手錄所爲詩都爲一
集以質諸朱函夏函夏爲之刪汰過半越七年戊
辰復輯其詩爲後集同知英廉序以行之時焯已

病痿恐旦夕就木屬函夏爲小傳埒卷末函夏謂焯四十以前詩涉筆婆婆娑貌妍致雋而真意不必盡副五句後蘊情宛約比物屬辭理趣蠕動於含吐之表以此觀之前之所汰或猶有少作其存者皆佳構也

花影菴集二卷

刻本

查爲仁撰 存

爲仁詩集總名蔗塘未定稟是集與下無題詩及是夢抱甕竹村花隴山游各集同爲蔗塘未定稟之一爲仁久繫西曹一時知名之士就而觴詠者絡繹不絕九年以來贈畲之什蔚然成帙因所居曰花影菴遂以名集所謂綴豪肺石之上染煙牢戶之中者此也

無題詩二卷

刻本

查爲仁撰 存

此卷爲爲仁繫獄時一時遊戲之作標名雖似豔體其實寄懷縹緲結想纏綿皆由鬱積無聊而出卽空卽色殆猶花影之命意耳其族查慎行序而行之

是夢集一卷

刻本

查爲仁撰 存

此卷爲爲仁出獄後之詩故署曰是夢其時爲仁雖居津沽而故宅仍在榆堡集中多有兩地往還

天津縣新志

卷二十三之二

十

攬物寫景之作若夫繫懷舊雨眷念前游尤於患難諸友三致意焉

抱甕集一卷

刻本

查爲仁撰 存

爲仁旣放廢息影水西屏絕人事惟蒔花種竹與二三同好歌歎其閒則此卷殆皆灌園餘暇揮豪寄興者也然前後十三年中存詩僅百餘首自謂刪蕪汰穢會去十之七八亦足見嚴剔而精選矣

竹村花鴨集一卷

刻本

查爲仁撰 存

爲仁幼嘗讀書錢塘之西溪地饒花竹之勝每欲卜宅是鄉有終焉之意旣嬰世網此志無償迨後

天津縣新志

卷二十三之二

十一

偶與杭人念及舊游眷懷勝地適續編詩彙成遂揭此意於簡端蓋雖韜跡水西不忘南方草木也

山游集一卷

刻本

查爲仁撰 存

爲仁嘗游田盤及西山諸勝各得詩若干首哀爲一集存之爲仁患難餘生息心禪悅故足跡所到每喜晤對高僧流連古刹發爲歌詠具證夙根是集本以紀游而同時贈畚讌集諸作亦併入焉

集堂詩草

查爲義撰

爲義字集堂有傳梅成棟謂爲義雖席豐履厚有山人林下之致故詩情閒曠可愛

銅鼓書堂遺稟三十二卷

刻本

查禮撰 存

是集凡爲詩二十四卷詞三卷雜文四卷詞話一卷禮幼席水西莊人文之盛嫿嬛萬卷誦讀其中所與游又皆當代名流故自十五已能詩造詣日邃迨後筮仕西南馳驅邊徼凡遇佳山水或絕險探幽伐山通道往往歌詠以紀其事而籌兵轉粟之勞威服蕃酋之畫見於詩章者尤多說者謂禮詩文俱有法度足與東南才儁連軌抗衡焉

懷南草堂詩稟

朱岷撰

岷字導江詳朱光覲傳朱氏北遷後再傳而替詩

天津縣新志

卷二十三之二

三

稟已佚今查爲仁集中存十首津門詩鈔存五首

炅齋詩一卷

刻本

胡睿烈撰 存

睿烈字文錫炅齋其號也埶胡捷傳睿烈與查氏論交最契故查禮所輯沾上題襟集有其詩一卷凡六十八首此外見於津門詩鈔者有三題爲題襟集所無可知禮所錄尙非睿烈全稟也

詩禮堂古文五卷

刻本

王又樸撰 存

又樸未達時卽已能治古文辭旣成進士以所爲文謁方苞京師執弟子禮苞曰古文非苟焉而作因示以義法舉史記蕭曹二世家爲例又樸大悟

盡出舊橐焚之遂不輕易爲文迨後筮仕吳中苞亦退老金陵因得時時請業一日見其橐詫曰二十年來何寥寥也又嘗報書又樸謂其文識高筆健直追古人今集中所存大半苞所點定亦有爲陳祖范所評者祖范又樸同年友也

詩禮堂雜詠七卷

刻本

王又樸撰

存

是書錄其編年詩每數年詩爲一小集而擊壤集僅有中卷則以鋟版時適止於斯也又樸在詞館日值青海平定製鐃歌鼓吹曲以進方苞謂之曰此東南未有才也又樸聞而以文爲贅遂請業焉

天津縣新志

卷二十三之二

三

李斗揚州畫舫錄謂又樸爲河工縣丞以詩學受知於盧見曾案又樸所歷官並無縣丞集內亦無與見曾投贈之詩詩禮堂雜纂敘師友淵源甚詳而不及此華鼎元據以纂入徵獻詩蓋失考耳

芳谷詩草一卷

曹雲昇撰

雲昇字慕庭有傳

蘭谷詩草

張如鉞撰

如鉞字彝伯埭徐兆舉傳

杏硯齋詩集一卷

鈔本

牛琳撰

存

琳字琢菴進士官知縣是集但錄其乾隆乙丑丙

寅宰山東沂水時由縣至郡及往來省會之作至
告養解組而止琳自乾隆丁巳通籍歷官至歷城
令生平吟詠當不祇此一卷津門詩鈔不載其詩
蓋當時此卷未出至楊光儀續纂津門詩鈔始物
色得之

清風草堂詩鈔八卷

刻本

余崢撰

存

崢字元平詳余堂傳崢自乾隆初舉博學鴻詞後
往來南北詩名甚震初有蒹葭亭刻藁板燬於火
是集多追錄舊詩續以晚年之作由其子杰編輯
而藏於家迨道光閒曾孫堂官廣東始以堂子作
天津縣新志

卷二十三之二

古

恭手鈔工楷本付諸剞劂前有查禮梅成棟各序
蓋崢居天津與禮兄爲仁相識爲水西莊賓客成
棟則與堂最稱莫逆者也

青蠅居士集一卷

鈔本

丁時顯撰

存

時顯字名揚埒于京傳時顯少卽工詩以青帘楊
柳市黃蝶菜花天得名人呼丁黃蝶旣卒士林惜
之其甥金玉岡哀挽之作尤多是集存詩百餘首
梅成棟謂其古體學李賀近體學劉長卿天才峭
拔無製不工

黃竹山房詩鈔十二卷

刻本

金玉岡撰

存

梅成棟謂玉岡詩骨之清如冰壺玉椀不著塵氛
又謂天然清氣獨往獨來與張舍人淫遙遙相接
是集卽成棟所選稟旋遺失其族曾孫漢官南河
通判時以副本付梓玉岡詩卷甚富分年編錄各
爲小集此統名黃竹山房者蓋成棟選錄時所定
也今各小集已不全其存者尙藏於家

步青堂餘草

徐金楷撰

金楷字端叔詳徐輝傳

南岡詩草十六卷

鈔本

于豹文撰

存

豹文字虹庭埒于京傳是集爲其族弟巨澍於其

天津縣新志

卷二十三之二

十五

臨卒時受託編錄六年之久始克成書存詩一千
五百四首豹文生平喜吟詠雖當病榻纏綿未嘗
閣筆巨澍親炙最久謂其詩格凡經數變清峻遙
深一歸性情之正梅成棟亦謂天津詩人能自成
家者有三豹文居其一詩律清堅選才宏富津門
詩鈔選錄甚多其詠明史絕句一百首全帙錄入
未嘗去一也

雉翔齋詩草二卷

于義文撰

義文字雪峯豹文從弟舉人官教諭

樂樹堂遺詩

樂樟撰

樟字樹堂有傳是集爲其子立寬所輯請序於中表周人麒刊以行之樟性最孝人麒謂集中念母諸詩言言血淚可以追配蓼莪今津門詩鈔所存惟客途之作其小傳謂樟箸有粵游草蓋梅成棟所見尙非全槁也

和樂堂文集

殷維玠撰

維玠字爾錫有傳

竹坡存草

金世熊撰

世熊字康侯埒金相傳

海天書屋詩集一卷

李湜撰

天津縣新志

卷二十三之二

六

湜字懷芳舉人官知縣

大雅堂詩草一卷

刻本張湘撰

湘字楚三有傳嘉慶甲戌其孫巖以湘遺詩屬梅成棟編次成棟謂其古體詩奇氣奔放發源青蓮讀之經月不能釋手旣而巖卒家人客中州文籍蕩失至道光己丑刊此集復求序於成棟成棟再讀之則較昔之所見不過十存二三矣

桐陰山房槁

汪舟撰

舟字楫之埒張湘傳

鐵雲詩槁

查善長撰

善長字樹初埏查爲仁傳

東軒詩草

查善和撰

善和字用咸善長弟埏查爲仁傳善和沒後詩集散逸其戚馬世桀藏近體數首長蘆鹽法志存古體二首

蜀道集一卷

刻本

章儔撰

存

儔字壽人號嬾芋布衣父紳武進士官廣東提督儔以貴介獨屏浮榮風雅是尙工詩善畫性復喜游嘗攬勝閩越稅駕西川集中有云梅花香裏羅浮夢睽隔高堂又幾春蓋其入蜀卽在其父官粵

天津縣新志

卷二十三之二

七

時也此集爲華光鼐所得藏家數十年光鼐子鐸孫攜以南游鐸版於廣州儔尙有駢雲西行兩集久佚不可復見矣

蓬山詩存二卷

刻本

鄭熊佳撰

存

熊佳字南翔埏金玉岡傳熊佳與高喆同時齊名喆以文著熊佳以詩著沈兆澣謂其詩格渾厚非塗飾字句者可比是集爲其孫士誠校刊以未第以前及仕粵諸作爲南翔集罷官北還仿坡公出峽之意爲出嶺集末埏嶺海疇唱集一卷

趙和六遺集

趙仲英撰

仲英舉人官學正

秋坪學吟草二卷

鈔本

王祿朋撰 存

祿朋字翼雲秋坪其號也坳吳人驥傳昔梅成棟求祿朋詩集其家祕之不可得慶雲崔旭嘗從其子借鈔數首恩恩索去津門詩鈔所錄殆卽旭所詒者原稟固未嘗見也是集今仍藏王氏家惟兩冊紙墨新舊不同且多譌脫似是散佚之後復行蒐輯者非原本也

一梧齋詩草

王希曾撰

希曾字省三坳翟淵傳

天津縣新志

卷二十三之二

六

林於館詩集二卷

鈔本

查昌業撰 存

昌業字立功坳金玉岡傳是集前有梅成棟手書題詞集內又有所注字甚多案津門詩鈔所選昌業詩云皆得諸金氏家藏是成棟選詩時尙未知有此本後乃得見之金氏所藏者有古體數首而此集僅五七言律詩各一卷恐非全稟也

草龕詩集

周自邵撰

自邵字景洛坳周焯傳

眠雲山人詩藁

牛克敬撰

克敬字聚堂琳子諸生半生恹憒盛年以沒詩學

大歷十子所著有臨風坐花聽雪玩月諸集長句最多

夢裏吟詩鈔一卷 鈔本 余杰撰 存

杰字千子崢子布衣少隨父自山陰徙天津故集中多旅居思鄉之作晚年嘗主徐浩家與金玉岡玉珽徐汝槐周自節浙人劉文煊往來酬會其末章爲恭遇千叟宴紀思雖存詩無多實全集也集後埶其子大煒詩大煒字耀庭入籍爲廩膳生早卒時子堂方在孩提旣長搜其遺詩僅得近體十首一首錄以存之

天津縣新志

卷二十三之二

九

和樂堂詩鈔五卷 刻本 殷希文撰 存

希文字郁堂埶殷維玠傳希文偃仰冷署二十餘年而性喜吟詠及宰縣未久而卒病革之前猶爲喜雨詩十數韻口授家人其詩格初學白居易中年以後自抒機軸旣沒子秉鏞哀輯遺藁倩幕友吳飛翰楷書付梓以行世

虛舟草一卷 戴思灝撰

思灝字虛舟布衣金銓謂其詩效中晚唐蔣玉虹曾藏其集

耕心堂刪餘草一卷 魯鏗撰

鏐字健菴布衣爲金玉岡弟子

隴頭小草一卷

金勝撰

勝官甘肅渭源典史詩當作於其時故以名集

歸與草堂集

金昶撰

昶字永和玉岡子

海上樵人藁十二卷

康堯衢撰

堯衢字達夫有傳

蕉石山房詩草一卷

鈔本

康堯衢撰

存

梅成棟謂堯衢詩沈鬱頓挫中能具凌雲出塵之致慶雲崔旭亦謂聲色臭味俱好是集存古近體

天津縣新志

卷二十三之二

三

一百五十五首中有與周自邵查昌業諸人倡酬之作其迎鑾詞云兩年恩蹕臨茲地則此集脫藁當在乾隆中葉也海上樵人藁今已不可見此爲其集外詩抑卽十二卷之一無得而知史樂善曾見其春及軒詩一卷而兩汀詩話所采錄多爲此集所有春及軒與此集是一是二亦不可知也

津門風物詩四卷

康堯衢撰

野田存草

金銓撰

梅成棟輯津門詩鈔時是集已散佚故僅存詩七

首

沽上羈游草一卷

金觀智撰

觀智字若水布衣與查昌業周自郃及從兄子銓同游倡和詩多散佚此集為其孫淳所藏

杖屐草

南游草

秦中草

郝仁撰

仁字壽朋坳康堯衢傳

閒情集

松崖草

陳大年撰

大年原名永齡字松崖號萊峯子布衣

木齋小草

孫鳴鐸撰

鳴鐸字木齋諸生與弟鳴鑾俱以詩名

蘿村雜體詩存一卷

刻本

吳曰圻撰

存

天津縣新志

卷二十三之二

三

曰圻字藉田詳吳士俊傳鄉居授徒不慕榮利惟時與汪舟張映斗輩雅集思源莊為觴詠之樂生平所為詩不自留藁子彰從故交搜得若干首孫士俊補綴刊行

妙香閣詩集

張虎拜撰

虎拜字錫山坳張霖傳

菴猗山房詩草一卷

刻本

周光裕撰

存

光裕字衣谷有傳是集載古近體七十餘首多紀事詩蓋擇有關身世者錄之光裕宰陝西時值楚匪擾境從戎九年其事蹟別無紀載惟此集略存

梗概耳

硯北草

徐瀾撰

瀾字東川埭徐永鑑傳

嚶鳴集一卷

沈嶧撰

嶧字東巖埭沈世華傳少與弟峻隨宦江西與諸暨陳法乾游詩學大進箸有斯集其從子兆澗謂集已久佚僅傳一聯云桂樹小山招隱士桃花流水憶秦人梅成棟亦謂嶧以此句得名其所輯津門詩鈔載嶧詩二十首當選自他集者也

存圃文集一卷

沈峻撰

天津縣新志

卷二十三之二

三

欣遇齋詩集十六卷

刻本

沈峻撰 存

峻年十五已學爲詩與兄嶧倡和時方隨父宦豫章閒游黔中因得縱觀山川風物之美厥後筮仕吳川遣戍塞外凡所遭際往往形諸歌獻積詩至三千餘首還里後手自編訂茲集所錄淘汰過半然生平學行略見於斯矣

映奎堂稟

陳居敬撰

居敬字惺園舉人官知縣

天游閣詩鈔

查誠撰

誠字衛中埭查爲仁傳

約齋詩存一卷

鈔本

黃成彥撰

存

成彥字碩人約齋其號也附黃謙傳是集由搜輯而得存詩無多益以津門詩鈔所載僅得三十七首其坵編三十餘首則酬應之作也

梅墅吟存一卷

馮智撰

智字坤三號前村舉人與康堯衢周自邵金銓同時倡和

夢陶山人學吟藁

馮晉撰

晉字西莊智從弟國子監生

梅村詩草一卷

周璠撰

天津縣新志

卷二十三之二

三

璠字海村坵周大綸傳

青來館吟藁十二卷

沈銓撰

是集亦名六琴十硯山房詩草今不傳僅津門詩鈔存詩二首別有古文九首不足成集坵志於此

皖城集一卷

鈔本

華蘭撰

存

蘭字省香號春浦詳華長卿傳蘭工詩與徐斨沈嶧齊嘉紹張虎拜同時倡和居京師館余集家出宰全椒識吳鼐於未第時與張葆光孫嘉瑜爲詩友旣沒藁帙散佚是集爲其孫長卿所得陶樑謂蘭詩清拔朗逸屏絕藻績采入畿輔詩傳其元孫

鐸孫輯其家四代詩遂以此集居首

小息舫詩草

查彬撰

是集前有沈峻序謂彬未第時游蹤幾半天下旗亭郵館到處豪吟其詩頗近開寶大家稍次亦在元和大厯閒李毓琛序謂彬詩各體皆工而尤長於樂府朱履中序謂歲甲子下榻淇署見其除夕之作愛其真又憐其窮茲來陽夏出示全藁又見其遇與境無不窮而詩亦無不工則其居官與詩格於此俱見矣

蔗香詩草

樂立本撰

天津縣新志

卷二十三之二

三

朗齋詩文集

徐烱撰

烱字仲晦埭徐斫傳斫嘗謂其詩詞旨風雅古文雜體亦皆擅長今集已不存

吟香書室詩文集

徐斫撰

留餘山房詩集二卷

樊宗清撰

宗清字印山副榜貢生官知縣齊嘉紹序謂宗清所爲詩率皆隨境揮灑流露自然不爲藻采浮聲志凝聲遠淵乎可思

寒竿集

樊宗澄撰

宗澄字鑑塘宗清弟

硯圃山房遺藁一卷 鈔本 樊宗浩撰

宗浩字涵輝號曉齋宗清從弟與宗清同科副榜
候選州判早卒子彬輯其客豫及行役之作得詩
一卷宗清爲之序

菊圃詩草 徐通復撰

通復字體誠埭周自邠傳

筠坡詩草 郭錫撰

津槎集 張樹之撰

樹之字德滋舉人官知縣

青立詩草 張靖撰

天津縣新志 卷二十三之二

三五

靖字青立坦曾孫拔貢生官知縣少以詩得名是
集嘗就梅成棟商訂今惟津門詩鈔存三首

黔中草 沈樂善撰

樂善字同人埭吳人驥傳

閩海詩存 沈士焯撰

士焯字階三埭吳人驥傳士焯始爲詩雅愛溫李
中年以後頗變其習受學於周自邠最工近體

竹村吟草 金紹驥撰

紹驥字竹村舉人官訓導

僑樵藁 喬耿甫撰

耿甫字默公埊金銓傳

六橋詩鈔

喬樹勳撰

樹勳字六橋耿甫弟諸生

拙石山房詩草一卷

梅履端撰

履端字雅村詳梅成棟傳

雄甫詩草

蔣玉虹撰

玉虹遺集其孫藏之祕不示人梅成棟輯津門詩
僅從友人口述得除夕述懷一首飲河樓得句北
平道中各斷句而已又謂玉虹有雜體文數卷而
不載集名姑埊此其文今惟存瘞骨記一首

天津縣新志

卷二十三之二

三

石斧集

康鈞撰

鈞字掌卿埊康堯衢傳

蔗村館詩一卷

金德瑩撰

德瑩字榕門勝子諸生

懷古齋學詩草

袁浩撰

浩字養源

立山詩草一卷

徐基撰

基字立山見徐輝傳沈峻謂其詩中有精意非堆
垛以求工者不盡唐音卻殊宋派其品故高

竹坡詩鈔一卷

鈔本

吳彰撰

存

彰字旌善號竹坡曰圻子詳吳士俊傳早孤家貧
壹志於學鄉舉後始學爲詩年已四十矣授徒鄉
里碌碌寡暇旣補冷官乃得閒詠是集存古今體
八十首蓋其子士俊所編錄者也

楚游小草 陳汝杰撰

汝杰字東華諸生屢試不第決然舍去游楚數年
縱覽名勝詩境大進後遭病廢以卒橐帙散失

卧隱齋詩草 王昭撰

昭字建中諸生

讀石山房小草 陳靖撰

天津縣新志 卷二十三之二

七

靖字青立增王玉璋傳

綠柳山房詩草 邢元植撰

元植字野航布衣

詩巢存橐四卷 周梓撰

梓字尺木諸生梅成棟謂其詩力追漢魏一掃輕
薄之習津門詩鈔選其古體七首

哀吟集一卷 鄭樸撰

鄭樸字笠艇有傳

天籟集 板扉吟 蓼蟲集 趙埜撰

埜詩集今已不傳津門詩鈔標其所著詩集凡三

種而選詩二十一首不云出自何集津門徵獻詩注別存一首則得諸口述亦不知爲何集所有也

味古齋詩草二卷

王翼涑撰

翼涑字句香希曾子

味古齋吟藁

王際清撰

際清字曉川翼涑弟

欲起竹閒樓文集四卷

鈔本

梅成棟撰

存

是集於其沒後六年子寶璐以文藁乞閩人廖炳奎選定凡存一百餘首成棟生平遇有忠孝節烈之事最喜紀載今所存表章之文幾占全集之半

天津縣新志

卷二十三之二

三

而救荒請振各稟牘亦均入焉故炳奎謂成棟文不苟作皆菽粟布帛之言其關繫一邦之文獻猶小其關繫世道人心爲大也

欲起竹閒樓存藁六卷

鈔本

梅成棟撰

存

成棟與余堂友善堂在廣東旣梓其所輯津門詩鈔復貽書請鐫其詩藁成棟少卽工詩至是已積數千首乃屬溫江蕭思諫汰冗刪繁得詩五百六十七首錄爲是集起乾隆乙卯至道光壬辰歷年吟詠俱有采摭思諫以爲傳世之作貴精不貴多故存詩雖視原藁不過十二而生平梗概可以窺

見無遺矣

欲起竹間樓存橐四卷

刻本

梅成棟撰 存

是集鐫板之年卽余堂索其詩橐之年故與蕭思諫選本相校若堂之序文思諫之跋語此本皆不之載其所選詩自道光辛巳迄於戊子不過八年而此八年之詩又多蕭本所未載蓋別一選本也

樹君詩鈔一卷

刻本

梅成棟撰 存

是集爲長洲陶樑選本燕南二俊詩鈔之一也樑在大名時嘗梓成棟詩及見其全集復有此選成棟原橐今已散失得此可補前二集所未備故並

天津縣新志

卷二十三之二

无

存之

自鏡閣詩草

梅嶺撰

嶺字庾仙應卜元孫諸生

鶴泉草一卷

毛凌皋撰

凌皋字一峯舉人

守拙齋詩集

鈔本

解道顯撰

道顯字小亭舉人官知縣是集前有楊光儀序謂道顯與梅成棟生同年月少同几視又同舉於鄉契分最深故集中倡和之作最多然津門詩鈔獨未錄其一詩意者前輩深於韜晦不欲以文字自

炫雖良友莫之能強也

善舟吟橐 王有慶撰

有慶字餘齋有傳

展蕉軒草 朱維翰撰

維翰字憲百坵朱光覲傳

竹泉詩草 諸遜撰

遜字竹泉諸生家貧棄舉業爲鈔關吏鬱鬱不自得其爲人風懷疏宕嘗與梅成棟詠弔古詩至得意時拍案叫絕掀硯墨汗衣袖人呼諸癡津門詩鈔存其詩八首

天津縣新志 卷二十三之二

三

青棠書屋詩橐一卷 繆共位撰

共位字星池諸生生平篤友朋之誼諸遜客死北塘爲之經紀其喪哭之以詩今津門詩鈔存其詩二十四首

夢崖草 李珠光撰

珠光字夢崖滉孫舉人

居易齋吟草一卷 刻本 華亭撰 存

亭字鶴立蘭子少隨仕江南師友薰陶頗喜吟詠是集存詩二十四首爲家集之一前有梅成棟序謂其詩清逸超妙摘取五七言斷句可入詩話者

甚多而集中不載蓋非全藁也

學半塾吟藁二卷 鈔本 楊輝祖撰

輝祖字玉堂號拙漁舉人教諭是集爲其少作凡詩四百餘首沒後失去華光僅得之於城東舊書肆介梅寶璐以原本歸其孫慎恭而摘其佳句載入所著脞錄中

石香詩草二卷 朱玟撰

玟字石香進士嘉善會孫布衣幼習弓馬迄無成就乃詣力於詩喜談三唐格律是集爲其生平全藁津門詩鈔選存十三首

天津縣新志 卷二十三之二

三

酣夢山房詩草 杜北斗撰

北斗字味拙布衣

晉游集一卷 劉維祺撰

維祺字介圃諸生數困名場絕意進取隨弟宦晉故有是集

延夢錄四卷 劉維祺撰

梅成棟謂維祺此箸爲時所傳欲起竹閒樓集有題延夢錄詩云寓言八九堪傷處似我年來費苦吟蓋維祺感懷往事抑鬱牢騷之作也

愛竹山房詩草 馮嘉蘭撰

嘉蘭字耕竹埒周自邠傳是集爲王履謙編輯序而藏之

冶堂詩集一卷 鈔本 張廷選撰 存

是集多與鄉人馮相棻繆共位李珠光輩拈題倡和又有旅邸題壁客途寫景諸詩蓋其家居讀書及游晉客都門之作凡存古今體一百五十首廷選年三十而卒故其詩所傳不多也別有文集錄其兩次恭逢巡幸所獻賦頌末埒古賦數首與此卷並藏於家

西湖雜詠一卷 張廷選撰

天津縣新志 卷二十三之二

三

是集爲其筮仕兩浙時所作今彙已佚惟津門詩鈔尙存十一首其從孫壽鈔埒冶堂詩集後

願學集 獨喙集 沈兆霑撰

兆霑字潤田見沈峻傳

織簾書屋文鈔 沈兆灃撰

織簾書屋詩鈔十二卷續鈔四卷 刻本 沈兆灃撰 存

兆灃少以塞下曲見賞於學政陳嵩慶刊入三輔采風錄詩名頗著時父峻已赦歸鄉里家學淵源所造益邃厥後宦游京外凡夫詠史述懷贈畚行旅之什積橐纍然其初集刻於陳臬河南時及引

退以後就養山東糧道署中復刻續集凡存詩一千二百首

蓬窗吟一卷

刻本

沈兆澐撰

存

道光庚子兆澐時爲江安糧道督運北上春往秋旋計程行五千六百餘里積一百七十餘日舟中餘暇拈韻抒懷遂成斯集先以付梓其後刻織簾書屋詩鈔亦載之第略有增減點竄耳

詠史詩鈔一卷

刻本

沈兆澐撰

存

兆澐前所爲詠史詩已散見於織簾書屋詩鈔是集爲其晚年所作於續詩鈔外別爲一卷集中體

天津縣新志

卷二十三之二

三

製不一或摹樂府或仿古詩其絕句六十首則雜事詩記事詩之類末附試帖十首蓋援唐詩別裁湖海詩傳俱收試律例載入也

游豫雜詠一卷

王履謙撰

履謙字益齋進士官知縣

南柯游草

卧梅詩草

且寄軒集

劉廷璐撰

廷璐字硯莊舉人知縣

南游草

馮相棻撰

相棻字石農智子副榜貢生

思誠書屋吟草四卷

鈔本

余堂撰

存

堂字階升有傳是集錄其未達時詩一卷筮仕嶺海詩二卷歸田以後詩一卷梅成棟嘗采其詩編入津門詩鈔慶雲崔旭題其集有人好詩亦好篇篇俱老成句然皆僅見其第一卷非全豹也堂服官廉能極有聲績凡士民之愛戀宦況之蕭條略見後三卷中讀此集者猶可髣髴得之

韻湖詩集二卷

鈔本

劉錫撰

存

錫字夢齡有傳梅成棟謂錫詩淒如曉風殘月幻如長峯怪嶺爭奇鬪捷傾動一時其卒之前一月嘗以橐就正成棟所謂寫梅閣詩草也茲別有一

天津縣新志

卷二十三之二

三

卷曰韻湖偶吟考其年月當爲二十以前往來晉秦所作復從其家得詩二卷一卽韻湖偶吟之橐而有集後詩若干首其一則錄由秦之楚諸詩而題中有謂孔峻峯溫東川袁玉堂皆歸里以後之作彙錄一帙名韻湖詩集至寫梅閣橐與此是一是二就詢於其家則謂先世宦游山左右琴書飄泊百不一存無得而知之矣

題畫詩一卷

劉錫撰

甌田初橐

劉錫撰

錫字聲于坵劉錫傳

芥軒詩草

魏天侯撰

天侯字無考歲貢生

古硯山房詩二卷

鈔本

金涓撰

存

涓字樸亭觀智孫廩膳生爲梅成棟弟子是集所載詩多道光癸巳甲午兩年閒之作與家集所存三十三首無一同者蓋脫彙有先後也

一得錄詩草

李和春撰

和春字靜亭舉人知縣初受學於黃新泰繼復從梅成棟游成棟謂其詩得宋元人意

朗山詩草一卷

鈔本

姚承恩撰

存

天津縣新志

卷二十三之二

三

承恩字桐雲朗山其號也埭姚逢年傳承恩受學於梅成棟頗有詩名道光閒重修水西莊旣成成棟立梅花詩社觴詠其閒承恩與焉承恩嘗以宦游南逾大河北出榆關作宰十餘年屢任繁劇而詩中未嘗一及其事蓋是集僅錄通籍以前之作非全彙也又善填詞有詩餘數首埭卷末

稔齋詩草一卷

鈔本

姚承豐撰

存

承豐字玉農埭姚逢年傳與兄承恩同爲梅成棟門人親炙較久集中命題多與朗山詩草相同想見分韻拈豪風雨連牀之樂其戚金漢官江蘇時

承豐嘗南游過江又值鄉人沈兆雲督運北上異鄉聚首各有歌詠其他登高攬勝及客途寫景之作亦復不少

見眞吾齋詩草十卷

彙本

徐大鏞撰

存

大鏞字東序號蘭生基子舉人官知縣少嘗學詩於梅成棟與寶坻高繼琦互相倡和迨幕游三晉筮仕中州以至譴戍塞外遂多吟詠放歸後僑居杞縣優游林下近三十年感事懷人得詩最夥大鏞遭際軼軻而能作達觀之語故詩格於長慶爲近所爲樂府亦極意摹倣蓋終身瓣香白傅者也

天津縣新志

卷二十三之二

三

蕉雨山房詩鈔四卷

鈔本

吳士俊撰

存

士俊詩才敏捷而又富於藻采往往一彙改竄再四極選聲妃色之工少作好以儷語拈題排比多首筮仕以後攬湘江之勝觀苗俗之奇以故紀行紀事諸詩充牣囊篋是集起道光丙戌終咸豐丁巳末埶試帖一卷爲同治壬申年作其題則皆采自經史者也

傅巖學吟詩草一卷

刻本

吳士俊撰

存

是集各體俱備多從蕉雨山房詩鈔選出類皆愜心之作梓以行世

傅巖讀史閒評一卷 刻本 吳士俊撰 存

是集專錄詠史詩亦從全集選出因類爲題發揮
胸臆排盪拗折往往出以歌行而近體亦偶有之
卽事論事別無寄託故曰閒評

瓣香廬詩草 李雲楣撰

雲楣字采仙埘李承鴻傳

黔游日記 李雲楣撰

原書已佚吳士俊有題黔游日記詩卷詩以此知
是集爲記游詩也

小蓬萊仙館詩草一卷 鈔本 徐文煥撰 存

天津縣新志 卷二十三之二 三

文煥字沆雲見徐永鑑傳是集存詩一百一十餘
首有華長卿孟繼坤題詞楊光儀輯津門詩續鈔
選其詩甚多道光閒沽上詩人起梅花社於水西
莊文煥嘗占一席詩筆雄健獨無當時薄弱之弊
故讀者多盛贊之文煥由教官選廣東知縣而集
中僅有永平學署諸作或者竟未度嶺與

嘉德堂文集一卷 鈔本 董懷新撰 存

懷新字西疇埘楊一崑傳是集巨細雜錯有類叢
鈔詩詞簡札凡應別存者皆羸列其中而津門古
文所見錄存其文三首轉未收入蓋隨錄所作未

及刪訂之彙也

時鳥集一卷

鈔本

董懷新撰

存

懷新爲梅成棟弟子少以蘆花詩見知於學使杜
堦才名甚噪生平喜爲謔浪之言然如是集譏諷
時事諸篇頗近白居易樂府其他所作不乖風人
之旨者亦甚多

石蓮集一卷

刻本

董懷新撰

存

懷新爲詩長於豔體哀其所作別爲一帙題曰香
簌集沒後及門華長卿從史樂善家得其手鈔本
選七十餘首刊行之視原彙存十之三閩人廖炳

天津縣新志

卷二十三之二

三

奎爲易此名

雨汀詩草一卷

梅影集二卷

史樂善撰

樂善字雨汀諸生

問青閣詩集十卷

刻本

樊彬撰

存

彬詩名最早又享大年故積彙頗富是集錄其出
仕以前及司訓冀州之作其師葉紹本爲之序紹
本於詩學素持雄深雅健不事險怪綺靡之論彬
詩格悉與之合契分極深集中師生倡和之作亦
最夥彬沒京師文物散失生平所著詩文彙帙大
半就湮惟此以刊本獨存也

竹墅詩存一卷

徐墀撰

墀字竹士爝子國子監生官候選州判

雲佐吟草

吳起元撰

起元字雲佐惠元兄舉人官教諭

惜陰山房草一卷

馮鳳超撰

鳳超字桐仙號古愚嘉蘭子早亡津門詩鈔附載

其詩一首

時還讀我書屋文鈔七卷

鈔本

華長卿撰

存

長卿終身勤學著述甚富不專以文字炫長是集駢散兼收洪纖悉具其中如經說六篇史例一篇

天津縣新志

卷二十三之二

三

及學宮九十九贊請易府州縣名議千家姓序皆蔚然巨製他如學署公牘之有關學術風化者亦收入焉長卿沒後其孫鐸孫持以質諸端木塚塚略加詮次並撰序文與王文錦所爲傳略同置卷首是集原名東觀室文鈔見所著開原徵書啟文內此蓋從其晚年齋名也

梅莊詩鈔三十二卷

刻本鈔本各十六卷

華長卿撰

存

長卿髫年從舅氏沈兆澐受書卽授以唐人五七言詩及成童從董懷新游懷新方選輯唐宋以來詩集長卿心尤好之時已學爲韻語其後客游南

北司訓遼東詩侶騷壇橐帙叢積是編起於嘉慶庚辰時年甫十六至解組歸里而止距其卒不過二年殆其全集也同治己巳嘗手自編輯梓行十六卷其半則僅具橐梅寶璐楊光儀各有刪定藏於家

四十賢人集一卷 刻本 華長卿撰 存

長卿在江甯時嘗自鈔五言律詩六七十首用唐人劉昭禹語題曰屠酤集攜之京師乞序於座師李宗昉宗昉賞之謂其音節高爽詞旨雋永卽稱爲四十賢人云胡不可遂易今名付梓以行

天津縣新志 卷二十三之二

罕

鸞言集一卷 刻本 華長卿撰 存

長卿自選其詩爲一編始道光戊戌迄於癸卯凡六年得詩五十首題曰鸞言集序謂非效無病之呻吟半屬有感之諷諭蓋其時值海疆多事皆有爲而作也其詩已載梅莊詩鈔茲選殆單行者耳

騰香館詩選一卷 鈔本 華長卿撰 存

長卿積詩甚富其孫鐸孫以遺橐乞孟繼坤選定凡得詩一百三十餘首列入家集以存梗概

浣石居詩草一卷 鈔本 華長吉撰 存

長吉字筠莊長卿弟諸生累試京兆不第橐筆客

游沒於山右其從孫鐸孫輯其遺藁僅得此卷列入家集中

伴梅軒吟草 華長庚撰

長庚字漁莊長卿從弟

倦鶴龕詩鈔一卷 鈔本 華長忠撰 存

長忠字葵生長卿再從弟舉人生平饒有才氣鬱鬱以終故所爲聲歌時以放縱自適茲集所錄惟五七言近體八十餘首殆皆斂才就範之作梅寶璐孟繼坤所選定編爲同聲集之一長忠別有倦鶴龕文藁僅駢散文各六首短札二十餘則文少

天津縣新志

卷二十三之二

四

不足成集附志於此

聽潮吟藁一卷 鈔本 曹用梁撰 存

用梁字友石雲昇曾孫增廣生是集後有周寶善題詞一首

石竹齋詩藁四卷 周寶善撰

寶善字楚良諸生是集前有李伯華楊煜李蓮賓費蔭樞各題詞

薔露山房詩藁 葛毓琦撰

菊坪詩鈔二卷續鈔一卷 刻本 姚學程撰 存

學程字景伊號菊坪妣姚逢年傳學程初以旅食

往來遼瀋繼復棲遲河洛事違其志頗鬱於懷其
後里居教授數年始爲遼陽學正與華長卿同官
一地舊雨重逢極詩酒倡酬之樂凡斯遭際往往
寄情於詩故數十年之憂愉於此集可約略得之
其首卷所列各題多與諸父承恩承豐同時會課
之作蓋亦執贄於梅成棟之門者也

譚風月齋詩草

喬聯璧撰

聯璧字筱泉舉人官同知

蓮品詩鈔一卷

刻本

王敬熙撰 存

敬熙字蓮品有傳是集存古近體一百三十餘首

天津縣新志

卷二十三之二

三

道光末梅寶璐重結梅花詩社以閩人廖炳奎爲
主裁敬熙得與其盛故集中多及斯事厥後復與
于士祐楊光儀時相倡和蓋性喜風雅晚年以此
自娛也集後增畏憫齋文鈔存文七篇

妙蓮華室詩草五卷

刻本

王增年撰 存

增年字逸蘭敬熙族弟諸生屢舉不第幕游南北
晚年浪跡山左終老異鄉生平喜謳吟積橐成帙
在山東與泰州宮本昂以詩結契本昂爲之鐫板
前有王蔭昌序謂蹉跎抑鬱而其所作絕無頽頹
蹙額狂呻病蠱之態可以窺其所養矣

秋園小詩四卷

刻本

張桐撰

存

桐字筱琴埏張霖傳是集鐫板於光緒初年而其詩多作於咸豐之際時方隨宦江西遭逢寇亂憂時感遇往往寄諸詠歌遂聞堂張氏自霖以迄於桐已歷七世而桐詩集內父子兄弟逮於閨秀率解謳吟時有倡和故家遺韻蓋猶有存焉

補拙堂詩集

謝焜撰

焜字耀之官總兵

未能免俗齋詩鈔三卷

刻本

賀崧齡撰

存

崧齡字星槎舉人官知州是集之詩始於讀書香

天津縣新志

卷二十三之二

三

林院其時年甫十五曰志學草二十以後就婚湖南曰楚游草其後攜家居京師充官學教習曰日下草迨作牧永甯案牘告勞旋以憂去永甯古石州因題曰石州草但在永甯無詩僅有石州草序以存厓略耳

括囊无咎詩橐

樊福恩撰

福恩原名景皋字鶴洲宗澄孫副榜貢生

選青堂詩存一卷

鈔本

張式芸撰

存

式芸字書田埏高喆傳式芸不以詩名而少嘗隨宦龍門後復司訓延慶其地皆遠在塞北中年又

嘗鼓楫南游浮江上泝生平蹤跡所至時有謳吟
是集存古近體四十餘首其爲人題集之詩或有
未編入者要其所作未多也

涔藻集

涔藻集

金鳳池撰

鳳池字掌綸平裔孫諸生

聞妙香館詩鈔二卷

刻本

梅寶璐撰

存

寶璐字小樹埭梅成棟傳寶璐稟承家學以詩得
名最早少隨父官永平其後幕游畿輔僕僕數十
年雖值寇氛偏境未嘗廢詩歸里後與楊光儀形
影相隨朝夕欣賞朝鮮閔種默越南阮述奉使過

天津縣新志

卷二十三之二

四

境皆以詩爲質納交甚歡知縣宮昱聞名請謁讀
其集而選刻之樂亭史夢蘭爲序其事卽此集也
存詩不過十之二三然迄今梅氏薤落遺稟存佚
難知有此尙可見一斑也

碧琅玕館文鈔三卷

鈔本

楊光儀撰

存

光儀品學見重一時又喜彰善表微故傳記序跋
之文多出其手旣遭時變世道日非往往箸爲論
辨發摠胸臆積稟得七十餘首蓋皆中年以後作
也其爲人序集嘗謂治古文者不可矜言宗派要
以達意爲主又稱述鄉先達沈兆澐之言曰文有

關世道人心者錄之觀其持論可以知其爲文矣
碧琅玕館詩鈔四卷續鈔四卷刻本楊光儀撰 存

是集前有其師張式芸序謂光儀詩得乾坤清氣
與鄉人張滢綠豔亭金玉岡黃竹山房各集後先
輝映其及門徐士鑾嘗稱述師說謂詩以理性情
雖偶爾倡酬亦必有真性情流露其閒又謂值時
事多艱烽煙迭警吾師隨所見聞託諸歌詠闡發
愈宏推敲愈細執騷壇牛耳者數十年宏獎風流
羣推宗匠士鑾守台州時爲之刊其初集及歸里
後復請刊續彙並行於世

天津縣新志

卷二十三之二

四

晚晴軒詩鈔四卷

留有餘齋詩鈔四卷

俱彙本

楊光儀

撰 存

前集刊於光緒癸未此爲其集後詩至庚子初春
而止癸巳以前名其集曰晚晴軒其後則爲留有
餘齋時方禍難迭興攬事抒懷不免憂憤之作逮
己亥以後衰病侵尋然猶未嘗輟詠第錄彙較少
耳兩集存詩一千四百餘首削去二百餘首皆生
前所自訂也

南有吟亭詩草二卷

刻本

于士祐撰

存

士祐字筠菴副榜貢生候選教諭工詩與楊光儀

梅寶璐友善時相倡酬生平鬱不得志往往寄懷歌詠光儀謂其詩具高曠之致無猥瑣之態意興所到自然警策異常是集存古近體二百二十餘首及門嚴修爲之刊行

晒齋詩彙一卷

杜官雲撰

官雲字蓮塘國子監生

鶴鳴山房詩彙四卷

彙本

金達瀾撰

存

達瀾字鶴山德瑩子諸生性寂靜不喜交游家有環青園時與家人觴詠其中勤學工文累試不第老無子女旋得旋失每當困鬱無聊之際惟以歌

天津縣新志

卷二十三之二

吳

歎自寬故積彙甚多未加詮次梅寶璐李慶辰略有評定亦未徧及也

敬恕齋遺彙二卷

刻本

張夢元撰

存

夢元嘗以卿銜督辦福建船政例得專摺言事故集內惟關白造船事宜之章奏函牘爲多其餘僅宰邵武時請權茶稅及守邵武時籌議錢糧團練文各一通附以家訓五十餘條古近體數首而已夢元服官四十年治匪理財最著聲譽會錄有公牘彙藏之篋中在粵毀於蟻故存者僅此也

蓮西詩鈔四卷

石印本

王維珍撰

存

維珍字蓮西進士官至通政司副使工書能詩罷官後閒居京邸以藝事自娛是集編次年月錯亂與其生平所歷先後不符蓋未釐訂之槁其開首一帙則其子頤勳所輯補者也

文波遺藁二卷

鈔本

鄭豫達撰

存

豫達原名學川字文波海客鐵夢鷗村海鶴問益皆其別號也布衣工詩善書尤嗜金石與華光鼐往來最密三世論交故集中多與華氏唱和之作生平所爲詩文不自珍惜隨手散失光鼐子啟孫就其家所存者得詩一百二十餘首釐爲二卷

天津縣新志

卷二十三之二

四

以金石跋尾六首殆其晚年文字也

一粟廬詩草一卷

鈔本

王壽安撰

存

壽安字仲菴玉璋曾孫玉璋仕粵子孫遂留廣東壽安生長是邦未嘗同里閨華鐸孫客粵時與之聚首異鄉每有新詩輒以相質此集卽鐸孫所藏得詩八十餘首壽安尙有全槁前嘗寄示族人至今音問不通矣

士林詩鈔三卷

鈔本

張大儒撰

存

大儒字士林廷綬子舉人官知縣是集分筮仕以前爲一卷在官時爲一卷落職家居爲一卷由其

從子壽詮次存詩七十餘首寄興抒懷聊具梗概耳

小鄒魯居文集八卷 鈔本 張大仕撰 存

是集駢文四卷散文四卷駢文以擬古者爲多散文以論史者爲多大仕肄業學海堂久此殆其課作也其子壽編輯遺藁於史論外爲雜文二卷如海運田制馭夷救荒防潦諸篇皆煌煌巨製然其他小題亦收入焉又以律賦隸駢文後蓋冀存手澤不令稍有湮沒也

小鄒魯居詩集七卷 鈔本 張大仕撰 存

天津縣新志 卷二十三之二 吳

是集爲其子壽編輯得古近體三百七十餘首依年爲次光緒以來率皆書院課作故寫景卽事之什不過十之一二而擬古詠古諸詩往往步韻聯章一題多至數十首蓋拈題限韻非出自己與自鳴天籟者不同然攬古慨今因題寄意未嘗不可見懷抱也

醉六吟草 楊慎恭撰

慎恭字醉六輝祖孫副貢生梅成棟謂其五絕節短音長寄託不少

荻湄詩草 徐思穉撰

思稗字笛梅大鏞子國子監生官縣丞

東觀室遺橐一卷 刻本 華光鼎撰 存

光鼎字少梅埭華長卿傳光鼎少卽工詩與梅寶璐楊光儀于士祐孟繼坤日以聲韻相切磨抱疾里居不廢吟詠光儀謂其詩蒼涼悲壯中別有纏緜不盡之致旣沒其子鐸孫搜輯遺橐得詩七十餘首編爲一卷埭家集中

緘齋詩存一卷 鈔本 華鼎元撰 存

是集存古近體五十九首爲人題集或步韻畲和之作居其大半鼎元少嘗隨宦開原集中詩多脫橐於此其後莅職京曹佐郡江南皆不之及蓋其生平吟詠當不祇此沒後橐就散佚僅由搜輯而得編列家集中故題曰詩存也

蝶訪居文鈔一卷 鈔本 徐士鑾撰 存

是集存文二十餘首如新開衛津河及重建育嬰堂兩碑記頗關掌故餘則序跋之類較多

蝶訪居詩鈔五卷 鈔本 徐士鑾撰 存

是集首卷爲其官京師及守台州時之詩餘皆歸田後所作士鑾每一詩成必就正於其師楊光儀然後錄存其時凡以詩納交於光儀者每及士鑾

天津縣新志

卷二十三之二

兕

故集中與樂亭史夢蘭臨桂倪鴻倡酬甚多而朝
鮮人亦往往有之集後附詞九首

治齋書屋詩草

徐嘉賢撰

嘉賢字少珊附徐城傳

笙詠集一卷

陳世鏞撰

世鏞字笙樵附陳其昌傳

吟香館詩橐

盧壽彤撰

壽彤原名恩溥字紹棠拔貢生官主事

寄齋詩草三卷

郭恩第撰

恩第字曼生舉人官主事

天津縣新志

卷二十三之二

辛

清發草堂詩文集二十四卷

鈔本

孟繼坤撰

繼坤字小帆附高喆傳楊光儀續輯津門詩時謂

繼坤著有詩星閣集十三卷則清發草堂當是詩

文集總名今多方思致其集卒不可得其所見

者惟津門詩續鈔錄存六十四首同時詩家所存

倡和題贈之作又數十首而已

綠莊巖館詩存一卷

鈔本

孟繼坤撰

存

繼坤字志青繼坤弟舉人官鹽法道是集爲其手

自編訂始於家居授徒至被命守郡而止得詩二

百餘首繼坤以中書舍人入直樞垣歷部曹遷臺

諫在京師凡二十年其閒多思鄉懷友政暇游宴之作又篤嗜金石往往獲一瓦拓一碑輒以歌行記其事及出典邊郡臨行贈別諸篇戀闕之思溢於言表殆詩之有性情者歟

夜郎吟一卷

刻本

孟繼堦撰

存

是集爲其守石阡時所作石阡古夜郎地故以爲名集中皆七言近體其卽景二十首專詠南徽花鳥林巒之異逐句詳注蓋志風土之作也

補拙山房詩藁

孟繼堦撰

繼堦字畹青繼坤從弟歲貢生

天津縣新志

卷二十三之二

至

倚笛樓詩鈔一卷

鈔本

趙世曾撰

世曾字星聯見趙新傳世曾早逝門祚中衰是集遂就湮失惟津門詩續鈔存其詩五十三首

今夕止可談風月齋詩鈔八卷

鈔本

徐維域撰

存

維域字少雲文煥子舉人官教諭是集存詩自十八歲始時方村居讀書迨鄉舉後十上春官不第東客遼陽南游大梁垂老始得一官復值變更學制生平遭際鬱不得志俱於集中見之

事餘小草一卷

鈔本

嚴克寬撰

存

是集前有楊光儀序克寬一生身心交瘁皆期實

濟於世初無意於爲詩偶有謳吟不過抒寫性情之作故集中存詩無幾皆三十以前舊藁不忍棄置者也

醉茶吟草四卷

鈔本

李慶辰撰

慶辰字筱筠別號醉茶子諸生襟懷曠逸力學安貧詩以盛唐爲宗五律尤近老杜沒後子亦病廢家世陵夷遺藁莫知所在楊光儀輯津門詩續鈔存其詩一百四十六首凡所簡選率多精銳之作雖非全部猶足張一軍也

雙清書屋吟草一卷

鈔本

王樾撰 存

天津縣新志

卷二十三之二

五

樾字雲清增年族子舉人官訓導是書無序跋前有楊光儀孟繼坤繼堯李慶辰諸人所注字有讀過數次者光儀繼坤並加墨焉至出關以後之作則諸人或遠宦或物故固未之見也凡存詩二百餘首其後半卷殆未刪定之藁

庚壬存餘錄一卷

鉛印本

李金海撰 存

金海字北溟廩貢生好學能文教授鄉里晚年爲會文總塾師成就甚眾生平爲文不喜留藁是集爲其門弟子所錄藏凡說經論史記事傳人及條議時務之文略具於是而請祀名宦修文廟創設

會文書院諸稟牘俱埒焉其曰庚壬者以其所錄由同治庚午至壬申三年間之稟居多也

味蕉軒詩彙一卷 周如江撰

如江字芷塘諸生

般若村人詩存一卷 刻本 張樾蔭撰 存

樾蔭字若村布衣埒王玉璋傳生平以畫著而詞章亦偶爲之是集爲其友人所存得詩一百一十

首埒詞二首

鵠葉菴遺藁一卷 刻本 陳珍撰 存

珍字亞璣埒王文運傳善畫能詩年二十五卒同

天津縣新志 卷二十三之二

五

人輯其藁刊行之中多題畫之作梅寶璐序謂使天假之年抒其所蓄未始不可埒庸風雅樹幟騷壇蓋深惜之也

嶺海集一卷 鈔本 華鐸孫撰 存

鐸孫字聽橋候選縣丞其師陳塏官廣東鐸孫入其幕中客游十載度嶺者三是集卽其客途往返及旅居抒懷之作也詩僅一卷埒家集末

茜濃山館未定草一卷 鈔本 韓蔭梓撰 存

蔭梓字仰橋號少泉諸生幼受業於孟繼坤饒有詩才年二十七以瘵卒茲集蓋其未冠時所作錄

橐以資考鏡者而不意遂止於斯也

抑齋詩文集 鈔本 陶喆牲撰 存

喆牲生平為學嘗自視欲然故所為詩文不自留
橐其弟赫牲錄而存之以學海堂課作為多

思岡齋詩文集二卷 王春瀛撰

春瀛字寅皆埵華金壽傳

嚴叔敏遺文一卷 石印本 嚴智庸撰 存

智庸字叔敏埵嚴克寬傳智庸才美而年不永既
卒王春瀛輯其遺文得十數首為立傳置卷首印
行之

天津縣新志 卷二十三之二 五

穆伯祺遺文一卷 鉛印本 穆奎齡撰 存

奎齡字伯祺京師大學堂師範畢業生好讀書頗
治古文辭不徒以科學為長所為文亦力避龐囂
不類近時俗體願生長富家獨鬱鬱不自得一日
疾發沈水死同人哀其志為輯遺文以存之

退居詩 釋世高撰

世高佚其名主大悲院晚名所居曰退居喜延接
名士與張霑契分最深霑嘗彙其詩橐而刊之

王野鶴詩 王聰撰

聰好讀書工吟詠沾上詩人多喜與之游於香林

院西側闢小屋數椽栽花種竹諸名士過從者拈韻倡和詩箋黏戶壁閒殆徧人稱詩廠張霏嘗爲序其集

雪笠山人詩集一卷 刻本 釋智方撰 存

智方字雪笠居海光寺卒於津是集前爲禪餘八居吟未知作於何時其後則名蓮喻閣詩草蓋駐錫以後之作多與津人倡和

禪餘吟草四卷 刻本 釋顯清撰 存

顯清字謹菴海光寺僧道光末梅寶璐重起梅花詩社顯清嘗與聯吟其中是集前有王敬熙題詞

天津縣新志 卷二十三之二

妻

芸書閣贖稟一卷 刻本 金至元撰 存

至元字載振有傳見列女志是集於其亡後搜得遺詩二十四首故云贖稟益以查爲仁倡和詩共爲一卷埒蔗塘外集陳鵬年謂至元詩清拔孤秀不染粉黛習氣胡捷謂集中哀楚之致多愉樂之聲少豈詩之果爲人讖歟

殘夢樓詩草 趙氏撰

趙氏樂浪佟鏌妻有傳見列女志

南游草一卷 刻本 王氏撰 存

王氏武生樂樟妻有傳見列女志王素工吟詠未

嘗以之示人卽樟初亦不知其能詩也嘗謂操觚
染翰與文人學士爭名豈婦道無成之義耶子立
敬領運興武衛時隨任往來南北是集皆其舟中
得句又有詠事詩若干首爲子立本所存與此俱
載入所著慇思錄中

問梅小草一卷

金沅撰

沅字芷汀有傳見列女志沅素喜文史旣歸梅成
棟從之學詩偶爾拈毫輒有佳詠又與其妹澧時
相酬畲然稟多焚棄不以炫長亡後成棟檢遺篋
中零篇殘帙得詩七十餘首以其號問梅女史題

天津縣新志

卷二十三之二

五

曰問梅小草

冰雪集

汪端一撰

端一王又曾妻見列女表

繡餘吟館詩草一卷

周常琇撰

常琇字友蘭光裕曾孫女幼隨宦山東偕諸弟讀
書官廨解毛詩論語孝經列女傳能作古今體詩
後歸餘杭朱氏帆楫往來時以歌詠寄與稟藏於
篋不以示人弟常彝哀輯得詩百數十首華長卿
爲之點定序以行之

蘊仙詩草一卷

刻本

張玉貞撰

存

玉貞字蘊仙有傳見列女志是集輯其四十以前所爲近體凡二百數十首就正於其戚吳秉慈秉慈序以行之玉貞天性純孝發爲聲歌輒有至情流露人謂其詩芬芳悱惻非虛譽也泣血詞八章蓋刻集後六年喪父時作其從父桐偶檢得之以其哀楚動人非同泛響續刊集末用章孝思未可以古無哭父母詩繩之也

押簾詞一卷

刻本

查爲仁撰 存

爲仁在西曹花影菴中時與高雲填詞倡和然不多作迨放歸沽上同人結消寒社拍韻鬪奇遂賡取宋人張先簾押卷花影句與所居齋額適有合也是集埒蔗塘未定稟後

天津縣新志

卷二十三之二

五

讀書舫詩餘

胡捷撰

誦芬堂詩餘一卷

沈起麟撰

是集有姜森跋謂起麟淡薄寡營惟耽心有韻之文而詩餘一道尤所神解著有數種已付梨棗今復填憶江南小令十二闋備述田園之樂蓋與余尙炳所跋之村居詩異曲同工者也

見眞吾齋詩餘二卷

稟本

徐大鏞撰 存

大鏞詩集多喜紀事填詞亦然集中所錄始於咸豐戊午蓋皆晚年之作時僑居杞縣正值捻匪犯豫來去豕突往往憂恐悲憤激而成聲感事抒懷誠歌詠之餘興耳

津門小令一卷

刻本

樊彬撰

存

彬自序謂嘗見人有爲揚州憶小令者愛其辭意新婉因思沾上有小揚州之目偶效其體得百餘首刪存八十首蓋竹枝之類所以紀風土也華鼎元采之爲梓里聯珠集之一

梧侯詞集一卷

鈔本

董懷新撰

存

天津縣新志

卷二十三之二

五

是集存詞六十餘闕略有改竄重加編次似懷新手自刪訂者且篇末綴卷上字華長卿亦謂懷新有詞二卷然則此特存其半耳

妙蓮華室詩餘二卷

刻本

王增年撰

存

增年橐筆游四方所至結交文士尤以善填詞有名於時長洲宋祖駿謂其詞格之高儼然兩宋遺製以東南之秀與之角逐匪惟無愧且可許其先登也泰州宮本昂爲鐫其橐與詩集並行於世

湖海草堂詞一卷

刻本

樊景升撰

存

景升字鶴舫見樊彬傳是集自序云予自十五歲

讀草堂詩餘始學爲小令有梧葉敲愁之句家大人見之謂勝於詩自是每年必得數十首後讀詞律乃知法律之嚴遂將少作焚之至今二十年所可存者不及百首乃深知此中甘苦也繆荃孫刻雲自在龕叢書收入名家詞內存三十二首

騰香館詞一卷

鈔本

華長卿撰

存

長卿與任邱邊浴禮寶坻高繼珩皆以善填詞得名有畿南三子之目是集存詞五十四首懷甯方朔序謂詞家蘇辛一派莫過迦陵姜張一派莫過樊榭然竹垞老人實兼能之作者源流於此故爾

天津縣新志

卷二十三之二

堯

冰絃玉軫之中而有鐵板銅琶之盛也

綠莊嚴館詩餘錄存一卷

鈔本

孟繼堦撰

存

是集存詞四十餘首卷首有自題絕句蓋官貴州時所錄舊作也繼堦嘗爲楊光儀題碧琅玕館集有齊天樂一闋脫稟當在光緒建元前後而此集不收然則集中所錄舊作殆皆出自三十年以前者也

昭明文選約錄

周人麒輯

兩漢文鈔

唐宋七家文鈔

董懷新輯

唐宋文錄解

周人麒輯

唐文拾遺

沈兆澐輯

歷代詩選

董懷新輯

是書凡分六種各爲一編曰漢魏六朝詩選曰唐詩選曰宋詩選曰金元詩選曰明詩選曰本朝四家詩選

唐詩類疏

周人麒撰

唐詩約編一卷

鈔本畢懷圖輯 存

懷圖字花江舉人官州學正是集專錄五言八韻爲草堂選本之續沈士焯序謂唐人詩無不可誦者惟試帖每不快人意是選質厚而詞麗皆佳製也

天津縣新志

卷二十三之二

卒

趨是集

周自郃輯

是集選示後學以唐杜甫王維孟浩然明高啟四家爲宗

耐吟集二卷

刻本梅成棟輯 存

成棟嘗選輯七言律詩百餘首以示學者其友余堂讀而好之愆息更選五言律各爲一卷梓以行世其書頗類姚鼐五七言今體詩鈔雖彼此取舍不同所收各家朝代亦異要其以唐爲主卽後代詩亦必有唐人法度者方能入選實與姚書同旨

也

發劄集三卷

鈔本

康堯衢輯

存

堯衢以課子授徒必使兼習詩賦爲輯是集示之
法程凡選六朝人古賦一卷近人律賦一卷唐人
試律及五七言近體詠物詩共一卷自序謂非以
詩賦遂盡乎此由此求之跬步千里亦行遠者之
一助爾

津門古文所見錄四卷

刻本

郭師泰輯

存

師泰字筠孫錫孫進士官知縣是書蒐集津人所
爲古文一百二十四首彙爲總集作者凡六十一

天津縣新志

卷二十三之二

空

人自道光以上逮於國初鄉里能文之士略備於
是矣邑人不喜刻集凡茲所輯大率得自傳鈔就
中如朱函夏紹夏周焯金相周人麒沈峻皆蔚然
作者其文集至今俱佚賴此猶可窺豹一斑師泰
多識鄉邦掌故每於諸家文後略綴數語用志舊
聞皆於文獻有關書成未及付梓而沒其戚華景
安捐資刊行之

津門文鈔二十四卷

鈔本

華光鼐輯

存

是書因津門古文所見錄而擴充之復收入道光
以來後出之作遂增多至兩倍竭一生搜羅之力

以成此編意在與梅成棟津門詩鈔並行於世俾鄉前輩文章風雅常存弗朽惜甫具稟遽爾下世其子鐸孫略加編次楊光儀梅寶璐各有釐訂徐士鑾爲之校正陳塏官廣東時鐸孫嘗攜此卷隨行塏欲捐資付梓未及行罷官歸里斯事遂閣文字顯晦得毋有數存耶

津門詩彙

樂立本輯

夫津詩人向無總集立本留心風雅搜輯成編其後梅成棟津門詩鈔刊行而此集遂無傳本究之成棟博采廣蓄不過因其所有而踵行之則此書

天津縣新志

卷二十三之二

空

實其先導也

津門詩鈔三十卷

刻本

梅成棟輯 存

是編采集有明以來文人學士逮於閨秀凡有詩可傳者得二百十六人人各繫以小傳其有軼事遺聞或殘篇斷句俱載詩後搜輯之富遂爲大觀至以朱岷余杰李承鴻顧永年錄入僑寓而以張霖查爲仁金平胡捷錄入邑賢同一子孫入籍而其祖父位置各殊於例似有出入要之皆沾上鈞游人也其時畿輔詩傳尙未編輯故特立郡賢一門欲使後之輯郡人詩者有所取擇焉

津門詩續鈔

無卷數鈔本

楊光儀輯 存

是編爲光儀晚年未卒業之書道光以來詩人接踵斯所選錄已得六十七家而所未及者尙夥自庚子兵劫前輩遺集多就散亡賴有是集之存猶可窺見鱗爪則功不在梅成棟下也

賞菊倡和詩一卷

刻本

查爲仁輯 存

是集爲蔗塘外集之一爲仁在西曹時偶得詠菊七律二首一時和者甚夥一日爲仁僕人從外歸拾一扇書閨秀趙瓊英所和詠菊詩又有天津水仙杜麗春者自言江西吉水女子亦降乩和二律

天津縣新志

卷二十三之二

三

皆用原韻此兩事甚奇故並錄之

花影菴雜記二卷

刻本

查爲仁輯 存

爲仁繫獄之七年得識會稽僧元宏元宏別號杜鵑老人亦自署高雲素與爲仁父友善故爲仁事之謹元宏亦以爲仁具有慧業發願皈依遂顏所居曰花影菴更授以偈錫法名曰成甦字曰蓮坡從此爲仁有居士之稱此卷記其師弟往返函牘而以倡和詩章爲多故輯爲蔗塘外集之一

沾上題襟集八卷

刻本

查禮輯 存

是集彙選水西莊賓主倡酬之作作者八人人各

一卷以爲自古友朋之樂多以詩傳然如南皮之游山陰之會不過旬日流連相從卽別今則數年聚首晨夕必俱較諸昔賢其樂倍之爰就每歲所爲詩各選數章編輯旣成工楷付梓最稱佳槧

山舟草一卷

刻本

鄭熊佳金玉岡同撰 存

是集爲熊佳玉岡在廣東五年閒倡和之作熊佳字蓬山玉岡字芥舟故以爲名其坵蓬山詩集後者亦曰嶺海疇唱集

秋吟集一卷

李雲楣輯

嘉慶庚午沽上詩人鄉闈報罷者共結詩社因感

天津縣新志

卷二十三之二

齋

寥落之意凡題皆冠以秋得詩十餘首而輟迨癸酉榜後復續前約入社者益多又得詩八十餘首雲楣彙而錄之以質諸梅成棟成棟補成十餘首共爲一卷序以行之

滁陽酬倡集二卷

刻本

李樹安編 存

樹安字靜軒候補衛千總改江蘇候補縣丞陞知縣樹安曾領運滁州滁爲歐蘇游宴之所景仰前賢時有歌詠將去以詩紀別同僚及門弟子依韻賡和後復縮符斯地欣續舊吟一時和者益眾爰彙而刊之名曰酬倡集

千古集一卷

鈔本

從善張邁德同撰

存

善字擇三諸生邁德字伯蕃是集無序跋蓋其生平投贈之作爲友人所存及其沒也搜輯各得若干首合錄一編題曰千古有人琴之慨焉

仙蝶圖詠二卷

鈔本

徐士鑾輯

存

士鑾官京師時嘗於廠肆得仙蝶圖三每得一冊輒徵題詠其有圖爲女士繪者亦徵女士題之罷官以後彙錄各詩成書二卷卷末有仙蝶故事若干條志舊聞也

梓里聯珠集五卷

鈔本

華鼎元輯

存

天津縣新志

卷二十三之二

奎

鼎元久客於外不無鄉土之思乃彙錄錢塘汪沆津門雜事詩仁和蔣詩沽河雜詠慶雲崔旭津門百詠縣人樊彬津門小令及所自著津門徵蹟詩都爲一集其體則竹枝詞其用則風土記也

遂閒堂張氏詩草二卷

鈔本

張虎士輯

存

虎士字環極埒張霖傳張氏代有詩人旣罹家難復燬於火彙帙散失存者無幾虎士搜訪得之於宗族親故雖殘編斷簡俱加珍襲積久編爲家集復手錄一通凡數十萬字甫葺事而以喪母哀毀卒集中所收凡五世九人虎士已作亦埒於末焉

金氏家集五卷

鈔本

金際泰金達瀾同輯 存

際泰字熙堂生平搜求先人遺藁謹守弗失及老以授族弟達瀾達瀾復增益之閱三年之久編爲家集以北遷之祖爲始凡歷七世得詩人三十家其同族而譜系無考者又得十四家彙爲四卷閨秀四人別爲一卷凡得詩四百三十八首

華氏同聲集八卷

鈔本

華鐸孫輯 存

鐸孫輯其先代詩旣成力營付梓以家貧旅食未竟厥功鐸孫初不肯以己作置其閒及卒家人取其遺集坵益之凡五代八人人各一卷其目分載

天津縣新志

卷二十三之二

矣

別集類中

絕妙好詞箋七卷

刻本

查爲仁錢塘厲鶚同撰 存

是書采入四庫其提要略云宋周密編南宋歌詞凡一百三十二家最爲善本爲仁采摭諸書以爲之箋各詳其里居出處或因詞而考證其本事或因人而坵載其佚聞以及諸家評論之語與其人之名篇秀句不見於此集者咸坵錄之會鶚亦方箋此集適游天津見爲仁所箋遂舉以付之刪複補漏合爲一書今簡端並題二人之名不沒其助成之力也

擬樂府補題一卷 刻本 查爲仁輯 存

爲仁自序略謂賦物詞以宋人樂府補題爲極詣浙西六家多和之此絕唱不當和也樊榭南香諸君卽其詞別擬一題織絹泉底杼軸自我予結習未忘頗有繼聲之作因並付開雕案是書亦名蔗塘外集而實在蔗塘外集之外其所擬題有五倡酬者爲仁與厲鶚陸培等凡十人云

少陵詩話纂一卷

胡捷輯

杜詩傳誦古今往往有所論贊然皆散見宋以來諸家詩文集中不相埒屬捷搜輯得百七十二條

天津縣新志

卷二十三之二

七

哀爲一帙自序云其閒議論反覆釋疑正譌或獨出己見或互相推究片語隻字不容輕過而非拘泥章句肆其穿鑿必會其神理論其時勢庶精深活潑兩得之矣

隨園詩話削繁二卷

鈔本 婁舉愷訂 存

舉愷字鶴田埭周光裕傳是書僅存原書十之二三蓋以原書多錄達官富賈藉以標榜酬畚其俳俚之作使人易學而不免於儂薄以此爲世詬病然其精粹者究未可磨滅舉愷爲之去其瑕而存其瑜展卷讀之居然完璧矣

蓮坡詩話三卷

刻本

查爲仁撰 存

是書載蔗塘外集自國初以來迄於乾隆初年其閒騷人墨客凡以詩學名家者莫不甄錄及之至如趙執信姜宸英吳廷華汪沆錢陳羣厲鶚杭世駿輩則皆爲仁契友或以吟筒往還或寓居水西別墅日相酬畲故所錄尤多自序所謂得於聞者二三得於見者七八也

吟齋筆存四卷

鈔本

梅成棟撰 存

是書隨筆條記仿詩話體而作偶及一二嘉言懿行不關詩事者亦詩話所有例也所收之詩雖不

天津縣新志

卷二十三之二

突

限以地而出自鄉人者爲多其成書在道光甲申以後凡津門詩鈔所遺或未及載者如顧贊章傅湯莖華琳董懷新諸人俱於此略見一斑可補彼書之闕

雨汀詩話八卷

史樂善撰

脞錄二卷

刻本

華光鼐輯 存

是書錄鄉人詩多由搜羅而得其體近於詩話略識緣起而不加評隲光鼐留心文獻以津門詩鈔久無續纂茲編所錄作者姓名多非彼書所有且各詩大率起結完具斷句無多俾將來再纂津人

詩者取材於此與徐士鑾敬鄉筆述所載諸詩同
是以詩存人之意耳

右集部三百二十一種

詩真 郭允昌撰

道源集 李眞福撰

桃源日記 黃謙撰

吉光片羽集 胡捷撰

四書話 于开撰

四字小學 于开撰

經緯字彙 于开撰

天津縣新志 卷二十三之二

充

二十一史然疑必識 查善和撰

珊瑚鞭 吳人驥撰

雲構詩談 康堯衢撰

天游閣雜箸 查誠撰

灤陽日記 沈銓撰

六朝統鏡 樂立本撰

詩律範金 樂立本撰

曉齋雜記 樊宗浩撰

同文拾瀋 焦景新撰

撫異錄 陸樟撰

管見編

梅成棟撰

實心編

尙論編

仰企編

發聲錄

沈兆燾撰

強識擇言

吳景周撰

塵寄

筆贅

黃閣撰

說詩臆語

史樂善撰

日知月無忘齋雜著

查省勤撰

靜學齋雜著

查毅勤撰

右二十八種不知原書本旨無從分類姑存其
目以撰者先後爲序

天津縣新志

卷二十三之二

七

天津縣新志卷二十三之二終